

古文辭類纂

第二函
第六冊

箴銘類

揚子雲州箴十二首

古文辭類纂六十

爾按子雲本傳云箴莫善於虞箴作州箴藝文志以州箴列於
儒家此本錄從藝文類聚別無善本蓋多舛誤子雲文尙奇詭
而趙充國頌及此文獨平易蓋箴頌之體宜爾也漢武帝元封
五年初置刺史部十三州晉書地志以冀幽并兗徐青揚荆豫
益涼及別方交趾是爲十三部而田仁於天漢大始之閒嘗刺
舉三河又在十三部之外其後征和四年置司隸校尉又其後
罷所領兵而使察三輔三河宏農於是無三河刺史而有司隸
是武帝時共十四部也昭帝初以河內屬冀州河東屬并州則
司隸但有二輔宏農河南其後成帝罷刺史置州牧哀帝始復
刺史而卒又改爲州牧馬司隸之官成帝時首哀帝時復然哀
帝雖復其官但屬大司空比於司直故本紀謂之正司直司隸
蓋自是佐三公舉朝廷不法者而已不復如成帝以前之督部
諸郡三輔也故自成帝省司隸後總爲十三部其時司隸所部
必分屬於豫涼二州矣但史言之不詳耳至平帝元始三年始
更十二州名分界郡國所屬其州名史亦不詳獨賴子雲是箴
而知之爾蓋設雍州以易涼州而朔方所部歸於并州而交趾
謂之交州王莽奏改州名云漢家十三州州名及界多不應經
此箴首必引禹貢所謂應經也平帝元始二年黃支國獻犀牛
其交州箴內亦述及焉然則其文必平帝時作當時王莽旣改
州名頗張其事蓋使人定爲地理之書今漢書地理志所本者
是也故地理志書戶口獨舉元始二年知其與州箴同時有也
志內每郡國必曰屬某州而三輔宏農河東武都隴西金城天

水十餘郡獨不著所屬此其舊書必曰屬雍州也班氏以雍州乃王莽專擅時所置之名故刊除之爾其實志內某郡屬某州大抵皆莽所定而漢平帝以前郡國分屬諸州之制莽所云不應經者皆不復可詳也自是迄莽之亡皆十二部建武中興改雍州爲司隸而復設。○
源州乃復爲十三部

冀州牧箴

洋洋冀州鴻原大陸嶽陽是都嶽夷皮服滂浚河流夾以碣石三后攸降列爲侯伯降周之末趙魏是宅冀州糜沸炫沍如湯更盛更衰載縱載橫陪臣擅命天王是替趙魏相反秦拾其敝北築長城恢夏之場漢興定制改列藩王仰覽前世厥力孔多初安如山後崩如崖故治不忘亂安不忘危周宗自怙云焉有子隳六國奮矯渠絕其維牧臣司冀敢告在階

揚州牧箴

矯矯揚州江漢之滸彭蠡旣豬陽鳥攸處橘柚羽貝瑤琨滌滌閩

越北垠，沅湘攸往，獷矣淮夷，蠢蠢荆蠻，翩彼昭王，南征不旋，人咸
躓於埵，莫躓於山，咸跌於汙，莫跌於川，明哲不云，我昭童蒙，不云
我昏，湯武聖而師，伊呂桀紂悖而誅，逢干蓋邇，不可不察，遠不可
不親，靡有孝而逆父，罔有義而忘君，泰伯遜位，基吳紹類，夫差一
誤，泰伯無祚，周室不匡，句踐入霸，當周之隆，越裳重譯，春秋之末，
侯甸畔逆，元首不可不思，股肱不可不孳，堯崇屢省，舜盛欽謀，牧
臣司揚，敢告執籌。

荆州牧箴

幽幽巫山，在荆之陽，江漢朝宗，其流湯湯，夏君遭澤，荆衡是調，雲
夢塗泥，包匭菁茅，金玉砥礪，象齒元龜，貢篚百物，世世以饒，戰戰
慄慄，至桀荒溢，曰我在帝位，若天有日，不順庶國，孰敢予奪，亦有
成湯，果秉其鉞，放之南巢，號之以桀，南巢茫茫，包楚與荆，風慄以

悍氣銳以剛。有道後服。無道先強。世雖安平。無敢逸豫。牧臣司荆。敢告執御。

青州牧箴

茫茫青州。海岱是極。鹽鐵之地。鉛松怪石。羣水攸歸。萊夷作牧。貢篚以時。莫怠莫違。昔在文武。封呂於齊。厥土塗泥。在邱之營。五侯九伯。是討是征。馬殆其銜。御失其度。周室荒亂。小白以霸。諸侯僉服。復尊京師。小白既沒。周卒陵遲。嗟茲天王。附命下土。失其法度。喪其文武。牧臣司青。敢告執矩。

徐州牧箴

海岱伊淮。東海是渚。徐州之士。邑於海宇。大野既瀦。有羽有蒙。孤桐蠙珠。泗沂攸同。實列藩蔽。侯衛東方。民好農蠶。大野以康。帝癸及辛。不祇不恪。沈湎于酒。而忘其東。作天命湯武。勦絕其緒。祚降

周任姜，鎮於琅琊。姜氏絕苗，田氏攸都。事由細微，不慮不圖。禍如邱山，本在萌芽。牧臣司徐，敢告僕夫。

兗州牧箴

悠悠濟河，兗州之寓。九河既道，雷夏攸處。草繇木條，漆絲絺紵。濟潔既通，降邱宅土。成湯五徙，卒都於亳。盤庚北渡，牧野是宅。丁感雝雝，祖已伊忠。爰正厥事，遂緒高宗。厥後陵遲，顛覆厥緒。西伯戡黎，祖伊奔走。致天威命，不恐不震。婦言是用，牝雞是晨。三仁既知，武果戎殷。牧野之禽，豈復能耽。甲子之朝，豈復能笑。有國雖久，必畏天咎。有民雖長，必懼人殃。箕子歎歎，厥居爲墟。牧臣司兗，敢告執書。

豫州牧箴

郁郁荆山，伊雝是經。榮播泉淥，惟用攸成。田田相擎，廬廬相距。夏

殷不都成周攸處。豫野所居。爰在鶉墟。四隩咸宅。寓內莫如。陪臣
執命。不慮不圖。王室陵遲。喪其爪牙。靡哲靡聖。捐失其正。方伯不
維。韓卒擅命。文武孔純。至厲作昏。成康孔寧。至幽作傾。故有天下
者。毋曰我大。莫或余敗。毋曰我強。靡克余亡。夏室九州。至於季世。
放於南巢。成康太平。降及周微。帶蔽屏營。屏營不起。施於孫子。至
赧爲極。實絕周祀。牧臣司豫。敢告柱史。

雍州牧箴

黑水西河。橫截崑崙。邪指閭闔。畫爲雍垠。上侵積石。下礙龍門。自
彼氐羌。莫敢不來庭。莫敢不來匡。每在季主。常失厥緒。侯紀不貢。
荒侵其宇。陵遲衰微。秦據以戾。興兵山東。六國顛沛。上帝不寧。命
漢作京。隴山以徂。列爲西荒。南排勁越。北啟彊胡。并連屬國。一護
攸都。蓋安不忘危。盛不諱衰。牧臣司雍。敢告綴衣。

益州牧箴

巖巖岷山古曰梁州華陽西極黑水南流茫茫洪波鯨堙降陸於
時八都厥民不隩禹導江沱岷嶓啟乾遠近底貢磬錯砮丹絲麻
條暢有稷有稻自京徂畛民攸溫飽帝有桀紂涵沈頗僻遏絕苗
民滅夏殷績爰周受命復古之常幽厲夷業破絕爲荒秦作無道
三方潰叛義兵征暴遂國於漢拓開疆宇恢梁之野列爲十二光
羨虞夏牧臣司梁是職是圖經營盛衰敢告士夫

幽州牧箴

蕩蕩平川惟冀之別北阨幽州戎夏交逼伊昔唐虞實爲平陸周
末薦臻迫於獯鬻晉失其陪周使不徂六國擅權燕趙本都東限
獫狁羨及東胡強秦北排蒙公城墻大漢初定介狄之荒元戎屢
征如風之騰義兵涉漠偃我邊萌既定且康復古虞唐盛不可不

圖衰不可或忘隄潰蟻穴器漏鍼芒牧臣司幽敢告侍劾

并州牧箴

雍別朔方河水悠悠北辟獯鬻南界涇流畫茲朔土正直幽方自昔何爲莫敢不來貢莫敢不來王周穆遐征犬戎不享爰貊伊德侵玩上國宣王命將攘之涇北宗周罔職日用爽蹉旣不俎豆又不干戈犬戎作難斃於驪阿太上曜德其次曜兵德兵俱顛靡不悴荒牧臣司并敢告執綱

交州牧箴

交州荒裔水與天際越裳是南荒國之外爰自開闢不羈不絆周公攝祚白雉是獻昭王陵遲周室是亂越裳絕貢荆楚逆叛四國內侵蠶食周宗臻於季赧遂入滅亡大漢受命中國兼該南海之宇聖武是恢稍稍受羈遂臻黃支杭海三萬來牽其犀盛不可不

憂隆不可不懼。顧瞻陵遲而忘其規摹。亡國多逸豫而存國多難。泉竭中虛。池竭瀕乾。牧臣司交。敢告執憲。

揚子雲酒箴

予猶瓶矣。觀瓶之居。居井之肩。處高臨深。動常近危。酒醪不入口。藏水滿懷。不得左右。牽於繆徽。一旦夷礙。爲裳所輻。身提黃泉。骨月爲泥。自用如此。不如鴟夷。鴟夷滑稽。腹如大壺。盡日盛酒。人復借酤。常爲國器。託於屬車。出入兩宮。經營公家。繇是言之。酒何過乎。

崔子玉座右銘

無道人之短。無說己之長。施人慎勿念。受施慎勿忘。世譽不足慕。唯仁爲紀綱。隱心而後動。謗議庸何傷。勿使名過實。守愚聖所臧。在涅貴不淄。曖曖內含光。柔弱生之徒。老氏戒剛強。行行鄙夫志。

悠悠故難量，慎言節飲食，知足勝不祥，行之苟有恆，久久自芬芳。

張孟陽劔閣銘

巖巖梁山，積石峨峨，遠屬荆衡，近綴岷嶓，南通邛樊，北達褒斜，狹過彭碣，高踰嵩華，惟蜀之門，作固作鎮，是曰劔閣，壁立千仞，窮地之險，極路之峻，世濁則逆，道清斯順，閉由往漢，開自有晉，秦得百二，并吞諸侯，齊得十二，田隄忒壽，矧茲狹隘，主之外區，一人荷戟，萬夫趨趨，形勝之地，匪與夷居，昔在武侯，中流而喜，山河之固，見屈吳起，興實在德，險亦難恃，洞庭孟門，二國不祀，自古迄今，天命不易，憑阻作昏，鮮不敗績，公孫旣滅，劉氏銜璧，覆車之軌，無或重跡，勒銘山阿，敢告梁益。

韓退之五箴

并序。韓退之五箴，交頌告辭。

人患不知其過，既知之不能改，是無勇也，余生三十有八年，髮之

短者日益白齒之搖者日益脫聰明不及於前時道德日負於初心其不至於君子而卒爲小人也昭昭矣作五箴以訟其惡云

游箴

余少之時將求多能早夜以孜孜余今之時旣飽而嬉蚤夜以無爲嗚呼余乎其無知乎君子之棄而小人之歸乎

言箴

不知言之人烏可與言知言之人默焉而其意已傳幕中之辨人反以汝爲叛臺中之評人反以汝爲傾汝不懲邪而呶呶以害其生邪

行箴

行與義乖言與法違後雖無害汝可以悔行也無邪言也無頗死而不死汝悔而何宜悔而休汝惡曷瘳宜休而悔汝善安在悔不

可追悔不可爲思而斯得汝則勿思

好惡箴

無善而好，不觀其道，無悖而惡，不詳其故。前之所好，今見其尤，從也爲比，捨也爲讐。前之所惡，今見其臧，從也爲愧，捨也爲狂。維讐維比，維狂維愧，於身不祥，於德不義。不義不祥，維惡之大，幾如是爲而不顛沛，齒之尙少，庸有不思。今其老矣，不愼胡爲。

知名箴

內不足者，急於人知，需焉有餘，厥聞四馳。今日告汝，知名之法，勿病無聞，病其曄曄。昔者子路，唯恐有聞，赫然千載，德譽愈尊。矜汝文章，負汝言語，乘人不能，拚以自取。汝非其父，汝非其師，不請而教，誰云不欺。欺以賈憎，拚以媒怨，汝曾不悟，以及於難。小人在辱，亦克知悔，及其旣寧，終莫能戒。旣出汝心，又銘汝前，汝如不顧，禍

亦宜然。而益快。愚以謂人論其德。則其德。而吾意。吾意。而無。自。

李習之行已箴。○

人之愛我。我度於義。義則爲朋。否則爲利。人之惡我。我思其由。過
寧不改。否。又何仇。仇實生怨。利實害德。我如不思。乃陷於惑。內省
不足。愧形於顏。中心無他。曷畏多言。惟咎在躬。若市於戮。慢虐自
他。匪汝之辱。昔者君子。惟禮是持。自小及大。曷莫從斯。苟遠於此。
其何不爲。事之在人。昧者亦知。遷焉及已。則莫之思。造次不戒。禍
焉可期。書之在側。以爲我師。

張子西銘。○

乾稱父。坤稱母。予茲藐焉。乃混然中處。故天地之塞。吾其體。天地
之帥。吾其性。民吾同胞。物吾與也。大君者。吾父母宗子。其大臣。宗
子之家相也。尊高年。所以長其長。慈孤弱。所以幼其幼。聖其合德。

賢其秀也。凡天下疲癯殘疾，憚獨鰥寡，皆吾兄弟之顛連而無告者也。于時保之子之翼也，樂且不憂，純乎孝者也。違曰悖德，害仁曰賊，濟惡者不才，其踐形惟肖者也。知化則善述其事，窮神則善繼其志，不愧屋漏爲無忝，存心養性爲匪懈，惡旨酒，崇伯子之顧養，育英才，潁封人之錫類，不弛勞而底豫，舜其功也。無所逃而待烹，申生其恭也。體其受而歸全者，參乎。勇於從而順令者，伯奇也。富貴福澤，將厚吾之生也。貧賤憂戚，庸玉汝於成也。存吾順事，沒吾寧也。

蘇子瞻徐州蓮華漏銘。

。實書。然。或。不。以。此。爲。疑。內。自。

故龍圖閣直學士禮部侍郎燕公肅以創物之智聞於天下，作蓮華漏，世服其精。凡公所臨必爲之，今州郡往往而在。雖有巧者莫能損益，而徐州獨用瞽人衛朴所造，廢法而任意，有壺而無箭，自

以無目而廢天下之視使守者伺其滿則決之而更注人莫不笑之國子博士傅君勱公之外曾孫得其法爲詳其通守是邦也實始改作而請銘於軾銘曰

人之所信者手足耳目也目識多寡手知重輕然人未有以手量而目計者必付之度量與權衡豈不自信而信物蓋以爲無意無我然後得萬物之情故天地之寒暑日月之晦明崑崙旁薄於三十八萬七千里之外而不能逃於三尺之箭五斗之瓶雖疾雷霆風雨雪晝晦而遲速有度不加虧贏使凡爲吏者如瓶之受水不過其量如水之浮箭不失其平如箭之升降也視時之上下降不爲辱升不爲榮則民將靡然而心服而寄我以死生矣

蘇子瞻九成臺銘

韶陽太守狄咸新作九成臺玉局散吏蘇軾爲之銘曰自秦并天

下滅禮樂韶之不作蓋千三百二十有三年其器存其人亡則韶
既已隱矣而況於人器兩亡而不傳雖然韶則亡矣而有不亡者
存蓋嘗與日月寒暑晦明風雨並行於天地之間世無南郭子綦
則耳未嘗聞地籟也而況得聞天籟使耳聞天籟則凡有形有聲
者皆吾羽旄干戚管磬匏絃嘗試與子登夫韶石之上舜峰之下
望蒼梧之眇莽九疑之聯綿覽觀江山之吐吞草木之俯仰鳥獸
之鳴號眾竅之呼吸往來唱和非有度數而均節自成者非韶之
大全乎上方立極以安天下人和而氣應氣應而樂作則夫所謂
簫韶九成來鳳鳥而舞百獸者既已燦然畢陳於前矣

頌贊類

古文辭類纂六十一

揚子雲趙充國頌。

明靈惟宣，戎有先零。先零猖狂，侵漢西疆。漢命虎臣，惟後將軍。整我六師，是討是震。既臨其域，喻以威德。有守矜功，謂之弗克。請奮其旅，於罕之羌。天子命我，從之鮮陽。營平守節，屢奏封章。料敵制勝，威謀靡亢。遂克西戎，還師於京。鬼方賓服，罔有不庭。昔周之宣，有方有虎。詩人歌功，乃列於雅。在漢中興，充國作武。赴赴桓桓，亦紹厥後。

韓退之子產不毀鄉校頌。

我思古人，伊鄭之僑。以禮相國，人未安其教。遊於鄉之校，眾口囂囂。或謂子產，毀鄉校則止。曰：何患焉？可以成美。夫豈多言，亦各其志。善也吾行，不善吾避。維善維否，我於此視。川不可防，言不可弭。

下塞上鬻，邦其傾矣。既鄉校不毀，而鄭國以理。在周之興，養老乞言，及其已衰，謗者使監，成敗之迹，昭哉可觀。維是子產執政之式，維其不遇，化止一國，誠率是道，相天下君，交暢旁達，施及無垠，於
序四海，所以不理，有君無臣，誰其嗣之。我思古人。

柳子厚伊尹五就桀贊。

伊尹五就桀，或疑曰：湯之仁聞且見矣，桀之不仁聞且見矣，夫胡去就之亟也？柳子曰：惡是吾所以見伊尹之大者也。彼伊尹，聖人也，聖人出於天下，不夏商其心，心乎生民而已。曰：孰能由吾言，由吾言者爲堯舜，而吾生人堯舜人矣。退而思曰：湯誠仁，其功遲，桀誠不仁，朝吾從而暮及於天下可也。於是就桀，桀果不可得，反而從湯，既而又思曰：尙可十一乎使斯人蚤被其澤也。又往就桀，桀不可，而又從湯，以至於百一千一萬一卒不可，乃相湯伐桀，俾湯

爲堯舜而人爲堯舜之人是吾所以見伊尹之大者也仁至於湯矣四去之不仁至於桀矣五就之大人之欲速其功如此不然湯桀之辨一恆人盡之矣又奚以憧憧聖人之足觀乎吾觀聖人之急生人莫若伊尹伊尹之大莫若於五就桀作伊尹五就桀贊聖有伊尹思德於民往歸湯之仁曰仁則仁矣非久不親退思其速之道宜夏是因就焉不可復反毫殷猶不忍其遲亟往以觀庶狂作聖一日勝殘至千萬莫一卒無其端五往不疲其心乃安遂升自陬黜桀尊湯遺民以完大人無形與道爲偶道之爲大爲人父母大矣伊尹惟聖之首既得其仁猶病其久恆人所疑我之所大嗚乎遠哉志以爲誨

蘇子瞻韓幹畫馬贊。

韓幹之馬四其一在陸驥首奮鬣若有所望頓足而長鳴其一欲

涉尻高首下擇所由濟跼踏而未成其二在水前者反顧若以鼻語後者不應欲飲而畱行以爲廐馬也則前無羈絡後無箠策以爲野馬也則隅目聳耳豐臆細尾皆中度程蕭然如賢大夫貴公子相與解帶脫帽臨水而濯纓遂欲高舉遠引友麋鹿而終天年則不可得矣蓋優哉游哉聊以卒歲而無營

蘇子瞻文與可飛白贊。

嗚呼哀哉與可豈其多好好奇也與抑其不試故藝也始予見其詩與文又得見其行草篆隸也以爲止此矣既沒一年而復見其飛白美哉多乎其盡萬物之態也霏霏乎其若輕雲之蔽月翻翻乎其若長風之卷旆也猗猗乎其若遊絲之縈柳絮裏裏乎其若流水之舞苜帶也離離乎其遠而相屬縮縮乎其近而不隘也其工至於如此而余乃今知之則余之知與可者固無幾而其所不

知者蓋不可勝計也嗚呼哀哉

古文辭類纂六十一

及無以

之無以

之無以

之無以

之無以

之無以

之無以

之無以

之無以

之無以

之無以

之無以

辭賦類一

古文辭類纂六十二

淳于髡諷齊威王。

威王八年，楚大發兵加齊，齊王使淳于髡之趙請救兵，齎金百斤，車馬十駟。淳于髡仰天大笑，冠纓索絕。王曰：「先生少之乎？」髡曰：「何敢？」王曰：「笑豈有說乎？」髡曰：「今者臣從東方來，見道旁有禳田者，操一豚蹄，酒一盃，祝曰：『甌窶滿篝，汙邪滿車，五穀蕃熟，穰穰滿家。』臣見其所持者狹，而所欲者奢，故笑之。」於是齊威王乃益齎黃金千鎰，白璧十雙，車馬百駟。髡辭而行，至趙，趙王與之精兵十萬，革車千乘。楚聞之，夜引兵而去。威王大說，置酒後宮，召髡賜之酒，問曰：「先生能飲幾何而醉？」髡對曰：「臣飲一斗亦醉，一石亦醉。」威王曰：「先生飲一斗而醉，惡能飲一石哉？」其說可得聞乎？髡曰：「賜酒大王之前，執法在旁，御史在後，髡恐懼俯伏而飲，不過一斗，徑醉矣。若親

有巖客。髡髮。鞞鞞。侍酒於前。時賜餘瀝。奉觴上壽。數起。飲不過
二斗。徑醉矣。若朋友交遊。久不相見。卒然相覩。歡然道故。私情相
語。飲可五六斗。徑醉矣。若乃州閭之會。男女雜坐。行酒稽留。六博
投壺。相引爲曹。握手無罰。目眙不禁。前有墮珥。後有遺簪。髡樂
此飲。可八斗。而醉。二參日莫。酒闌。合尊促坐。男女同席。履舄交錯。
杯盤狼籍。堂上燭滅。主人留髡而送客。羅襦襟解。微聞薌澤。當此
之時。髡心最歡。能飲一石。故曰酒極則亂。樂極則悲。萬事盡然。言
不可極。極之而衰。以諷諫焉。齊王曰善。乃罷長夜之飲。以髡爲諸
侯主客。宗室置酒。髡嘗在側。

屈原離騷。

帝高陽之苗裔兮。朕皇考曰伯庸。攝提貞於孟陬兮。惟庚寅吾以
降。皇覽揆余於初度兮。肇錫余以嘉名。名余曰正則兮。字余曰靈

均紛吾既有此內美兮。又重之以修能。扈江離與辟芷兮。初秋蘭以爲佩。汨余若將不及兮。恐年歲之不吾與。朝搴阰之木蘭兮。夕攬洲之宿莽。日月忽其不淹兮。春與秋其代序。惟草木之零落兮。恐美人之遲暮。不撫壯而棄穢兮。何不改乎此度也。乘騏驥以馳騁兮。來吾導夫先路。昔三后之純粹兮。固眾芳之所在。雜申椒與菌桂兮。豈惟紉夫蕙蒨。彼堯舜之耿介兮。既遵道而得路。何桀紂之昌披兮。夫惟捷徑以窘步。惟黨人之偷樂兮。路幽昧以險隘。豈余身之憚殃兮。恐皇輿之敗績。忽奔走以先後兮。及前王之踵武。至不察余之中情兮。反信讒而齊怒。余固知謇謇之爲患兮。忍而不能舍也。指九天以爲正兮。夫惟靈修之故也。初既與余成言兮。後悔遯而有佗。余既不難夫離別兮。傷靈修之數化。余既滋蘭之九畹兮。又樹蕙之百畝。畦畹夷與揚車兮。雜杜蘅與芳芷。冀枝葉

之峻茂兮。願蒞時乎。吾將刈。雖萎絕其亦何傷兮。哀眾芳之蕪穢。

以上言以道事君見疑而不改

眾皆競進以貪婪兮。憑不厭乎求索。羌內恕己以量人。

兮。各興心而嫉妬。忽馳騫以追逐兮。非余心之所急。老冉冉其將

至兮。恐修名之不立。朝飲木蘭之墜露兮。夕餐秋菊之落英。苟余

情其信姱以練要兮。長願頌亦何傷。擗木根以結茝兮。貫薜荔之

落蘂。矯菌桂以紉蕙兮。索胡繩之纏纏。謇吾法夫前修兮。非時俗

之所服。雖不周於今之人兮。願依彭咸之遺則。長太息以掩涕兮。

哀人生之多艱。

二句疑誤。蓋游與替爲韻。齊東野語已有此說。

余雖好修姱以鞿羈兮。謇朝諝而

夕替。既替余以蕙纒兮。又申之以攬芷。亦余心之所善兮。雖九死

其猶未悔。怨靈修之浩蕩兮。終不察夫人心。眾女嫉余之蛾眉兮。

謠詠謂余以善淫。固時俗之工巧兮。偃規矩而改錯。背繩墨以追

曲兮。競周容以爲度。忤鬱邑余侘傺兮。吾獨窮困乎此時也。寧溘

死以流亡兮。余不忍爲此態也。鸞鳥之不羣兮。自前代而固然。何

方圓之能周兮。夫孰異道而相安。屈心而抑志兮。忍尤而攘詬。伏

清白以死直兮。固前聖之所厚。以上言讒人之害而將濟于死悔相道之不察兮。延佇

乎吾將反。回朕車以復路兮。及行迷之未遠。步余馬於蘭皋兮。馳

椒邱且焉止息。進不入以離尤兮。退將復修吾初服。製芟荷以爲

衣兮。集芙蓉以爲裳。不吾知其亦已兮。苟余情其信芳。高余冠之

岌岌兮。長余佩之陸離。芳與澤其雜糅兮。唯昭質其猶未虧。忽反

顧以游目兮。將往觀乎四荒。佩繽紛其繁飾兮。芳菲菲其彌章。言音

德美將適四方乎若居楚國芳菲彌章安能使人之不思乎人生各有所樂兮。余獨好修以爲常。常當作恆

雖體解吾猶未變兮。豈余心之可懲。以上言欲退隱不涉世患而不能也此段

朋之所珍者屈子于此已解其難女嬃之嬋媛兮。申申其詈予。曰鮌婞直以亡身兮。終然

天平羽之野。汝何博謇而好修兮。紛獨有此姱節。薺菜施以盈室。

兮判獨離而不服眾不可戶說兮孰云察余之中情世並舉而好

朋兮夫何熒獨而不予聽以上設爲女與辭所謂慎毋爲善也依前聖以節中兮喟憑心而

歷茲濟沅湘以南征兮就重華而陳辭啟九辯與九歌兮夏康娛

以自縱啟九辯下十六句皆言失道君之致禍湯禹四句皆言得道君之致福啟之失道載逸書武觀篇墨子所引是也屈子以與澆金斤爲康娛王逸誤以夏康連讀解爲太康僞

作古文者遂有太康尸位之語其失始於逸也不顧難以圖後兮五子用失乎家巷羿淫遊以佚

田兮又好射夫封狐固亂流其鮮終兮浞又貪夫厥家澆身被服

疆圉兮縱欲而不忍日康娛而自忘兮厥首用夫顛隕夏桀之常

違兮乃遂焉而逢殃后辛之菹醢兮殷宗用而不長湯禹嚴而祇

敬兮周論道而莫差舉賢而授能兮循繩墨而不頗皇天無私阿

兮覽民德焉錯輔夫維聖哲以茂行兮苟得用此下土瞻前而顧

後兮相觀民之計極夫孰非義而可用兮孰非善而可服玷余身

而危死兮覽余初其猶未悔不量鑿而正柄兮固前修以菹醢曾

虜欲余鬱悒兮哀朕時之不當攬茹蕙以掩涕兮霑余襟之浪浪

以上言以此心正於舜而無愧又安能不為善也跪敷衽以陳辭兮耿吾既得此中正駟玉虬以乘

鸞兮溘埃風余上征此下承往觀乎四荒極言之而卒歸於不可所謂發乎情止乎理義朝發軔於蒼梧兮夕

余至乎縣圃欲少留此靈璫兮日忽忽其將暮吾令羲和弭節兮

望崦嵫而勿迫路漫漫其修遠兮吾將上下而求索飲余馬於咸

池兮總余轡乎扶桑折若木以拂日兮聊須臾以相羊前望舒使

先驅兮後蜚廉使奔屬鸞皇為余先戒兮雷師告余以未具吾令

鳳鳥飛騰兮又繼之以日夜飄風屯其相離兮帥雲霓而來御紛

總總其離合兮班陸離其上下吾令帝閭開關兮倚闔闔而望予

時曖曖其將罷兮結幽蘭而延佇世溷濁而不分兮好蔽美而嫉

妒朝吾將濟於白水兮登閶風而縹馬忽反顧以流涕兮哀高邱

之無女溘吾遊此春宮兮折瓊枝以繼佩及榮華之未落兮相下

之無女溘吾遊此春宮兮折瓊枝以繼佩及榮華之未落兮相下

女之可貽吾令豐隆乘雲兮求處妃之所在解佩纓以結言兮吾

令蹇修以為理紛總總其離合兮忽緯繡其難遷夕歸次於窮石

兮朝濯髮乎洧槃保厥美以驕傲兮日康娛以淫遊雖信美而無

禮兮來違棄而改求處妃者蓋后羿之妻天問所謂妻彼洛嬭者是也言方令蹇修為理而彼乃難於遷而歸我而反適無道之羿相從於驕傲無禮何足顧

耶羿自鋤遷於窮石窮石是羿國凡淮南子山海經之類多依楚詞妄為附會皆不足據上言相下女故慮妃有娥二姚皆下土女非謂神也覽相觀於四極兮

周流乎天余乃下望瑤臺之偃蹇兮見有娥之佚女吾令鳩為媒

兮鳩告余以不好雄鳩之鳴逝兮余猶惡其佻巧心猶豫而狐疑

兮欲自適而不可鳳鳥既受詒兮恐高辛之先我欲遠集而無所

止兮聊浮遊以逍遙及少康之未家兮畱有虞之二姚理弱而媒

拙兮恐導言之不固時溷濁而嫉賢兮好蔽美而稱惡閨中既以

邃遠兮哲王又不寤懷朕情而不發兮余焉能忍與此終古以上言將以此

中正適於茲世其於楚也則如天閨之不通是哲王不寤也其於異國則世無賢君相從驕傲或有賢而非我偶如佚女之不可求是閨中邃遠也索瓊茅以筵尊兮

命靈氛爲余占之曰兩美其必合兮孰信修而慕之思九州之博
大兮豈唯是其有女曰勉遠逝而無狐疑兮孰求美而釋汝何所
獨無芳草兮爾何懷乎故宇世幽昧以眩曜兮孰云察余之美惡
人好惡其不同兮惟此黨人其獨異戶服艾以盈要兮謂幽蘭其
不可佩覽察草木其猶未得兮豈瑾美之能當蘇蕤壤以充幃兮
謂申椒其不芳以上皆靈氛之詞欲從靈氛之吉占兮心猶豫而狐疑巫咸
將夕降兮懷椒糝而要之百神翳其備降兮九疑繽其竝迎皇剡
剡其揚靈兮告余以吉故曰勉升降以上下兮求矩矱之所同湯
禹儼而求合兮摯皋繇而能調苟中情其好修兮何必用夫行媒
說操築於傅巖兮武丁用而不疑呂望之鼓刀兮遭周文而得舉
甯戚之謳歌兮齊桓聞以該輔及年歲之未晏兮時亦猶其未央
恐羈鴟之先鳴兮使百草爲之不芳何瓊佩之偃蹇兮眾夔然而

蔽之惟此黨人之不亮兮恐嫉妒而折之時續紛其變易兮又何

可以淹畱蘭芷變而不芳兮荃蕙化而為茅何昔日之芳草兮今

直為此蕭艾也豈其有他故兮莫好修之害也靈氛第言世之幽昧而已巫咸則言黨人之害益深

中材畏而從之矣是既無復同志之人而居此則必遭其折害而死其勢益危矣余以蘭為可恃兮羌無實而容長委厥

美以從俗兮苟得列乎眾芳椒專佞以慢諂兮椒又欲充其佩幃

既干進而務入兮又何芳之能祇固時俗之從流兮又孰能無變

化覽椒蘭其若茲兮又況揭車與江離惟茲佩之可貴兮委厥美

而歷茲芳菲菲而難虧兮芬至今猶未沫和調度以自娛兮聊浮

游而求女及余飾之方壯兮周流觀乎上下以上皆巫咸之詞靈氛既告余

以吉占兮言承靈氛則巫咸在其內矣歷吉日乎吾將行折瓊枝以為羞兮精瓊靡

以為粢為余駕飛龍兮雜瑤象以為車何離心之可同兮吾將遠

逝以自疏上處妃有娥一節猶言求女靈氛巫咸二節亦以求女為言欲其擇君而事也至此節則知求女之必不可矣姑遠逝以自疏遊遊娛樂如遠遊一篇之旨而卒亦

不忍則死從彭咸焉而已也

遭吾道夫崑崙兮路修遠以周流揚雲霓之晦藹兮鳴

玉鸞之啾啾朝發軔於天津兮夕余至乎西極鳳皇翼其承旂兮
高翱翔之翼翼忽吾行此流沙兮遵赤水而容與麾蛟龍使梁津
兮詔西皇使涉予路修遠以多艱兮騰眾車使徑待路不周以左
轉兮指西海以爲期屯余車其千乘兮齊玉軼而竝馳駕八龍之
婉婉兮載雲旗之委移抑志而弭節兮神高馳之邈邈奏九歌而
舞韶兮聊假日以媮樂陟升皇之赫戲兮忽臨睨夫舊鄉僕夫悲
余馬懷兮蜷局顧而不行亂曰已矣哉國無人莫我知兮又何懷
乎故都既莫足與爲美政兮吾將從彭咸之所居

屈原九章

惜誦

惜誦以致愍兮發憤以抒情所非忠而言之兮指蒼天以爲正令

五帝以折中兮。戒六神與嚮服。俾山川以備御兮。命咎繇使聽直。竭忠誠以事君兮。反離羣而贅肱。忘儼媚以背眾兮。待明君其知之。言與行其可迹兮。情與貌其不變。故相臣莫若君兮。所以證之不遠。吾誼先君而後身兮。羌眾人之所仇也。專惟君而無他兮。又眾兆之所讐也。壹心而不豫兮。羌不可保也。疾親君而無他兮。有招禍之道也。思君其莫我忠兮。忽忘身之賤貧。事君而不貳兮。迷不知寵之門。忠何辜以遇罰兮。亦非余之所志也。行不羣以顛越兮。又眾兆之所哈也。紛逢尤以離謗兮。譽不可釋也。情沈抑而不達兮。又蔽而莫之白也。心鬱邑余侘傺兮。又莫察余之中情。固煩言不可結而詒兮。願陳志而無路。退靜默而莫余知兮。進號呼又莫吾聞。申侘傺之煩惑兮。中悶瞀之忼忼。昔余夢登天兮。魂中道而無杭。吾使厲神占之兮。曰有志極而無旁。終危獨以離異兮。曰

君可思而不可恃。故眾口其鑠金兮。初若是而逢殆。懲熱羹而吹
齋兮。何不變此志也。欲釋階而登天兮。猶有曩之態也。眾駭遽以
離心兮。又何以爲此伴也。同極而異路兮。又何以爲此援也。昔申
生之孝子兮。父信讒而不好。行婞直而不豫兮。鮪功用而不就。吾
聞作忠以造怨兮。忽謂之過言。九折臂而成醫兮。吾至今乃知其
信然。矰弋機而在上兮。尉羅張而在下。設張辟以娛君兮。願側身
而無所欲。儻徇以干僚兮。恐重患而離尤。欲高飛而遠集兮。君罔
謂女何之。欲橫奔而失路兮。蓋堅志而不忍。背膺脾以交痛兮。心
鬱結而紆軫。擣木蘭以擣蕙兮。繫申椒以爲糧。播江蘼與滋菊兮。
願春日以爲糗芳。恐情質之不信兮。故重著以自明。擣茲矰以私
處兮。願曾思而遠身。

兼疑此篇與離騷同
時作故有重著之語

涉江

余幼好此奇服兮。年既老而不衰。帶長鋏之陸離兮。冠切雲之崔嵬。被明月兮佩寶璐。世溷濁而莫余知兮。吾方高馳而不顧。駕青虬兮。馱白螭。吾與重華遊兮。瑤之圃。登崑崙兮。食玉英。與天地兮比壽。與日月兮齊光。哀南夷之莫吾知兮。且余濟乎江湘。乘鄂渚而反顧兮。欵秋冬之緒風。步余馬兮山臯。邸余車兮方林。乘船船而余上沅兮。齊吳榜以擊汰。船容與而不進兮。淹回水而疑滯。朝發枉渚兮。夕宿辰陽。苟余心其端直兮。雖僻遠其何傷。入澗浦余儻徊兮。迷不知吾所如。深林杳以冥冥兮。乃猿狖之所居。山峻高而蔽日兮。下幽晦以多雨。霰雪紛其無垠兮。雲霏霏而承宇。哀吾生之無樂兮。幽獨處乎山中。吾不能變心而從俗兮。固將愁苦而終窮。接輿髡首兮。桑扈羸行。忠不必用兮。賢不必以。伍子逢殃兮。比干菹醢。與前世而皆然兮。吾又何怨乎今之人。余將董道而不豫。

兮。固將重昏而終身。亂曰。鸞鳥鳳皇。日以遠兮。燕雀烏鵲。巢堂壇兮。露申辛夷。死林薄兮。腥臊並御。芳不得薄兮。陰陽易位。時不當兮。懷信侘傺。忽乎吾將行兮。

哀郢

皇天之不純命兮。何百姓之震愆。民離散而相失兮。方仲春而東遷。去故鄉而就遠兮。遵江夏以流亡。出國門而軫懷兮。甲之鼂吾以行。發郢而去閭兮。招荒忽其焉極。楫壅揚以容與兮。哀見君而不再得。望長楸而太息兮。涕淫淫其若霰。過夏首而西浮兮。顧龍門而不見。心嬋媛而傷懷兮。眇不知余所躑。順風波而流從兮。焉洋洋而爲客。凌陽侯之汜濫兮。忽翱翔之焉薄。心絳結而不解兮。思蹇產而不釋。將運舟而下浮兮。上洞庭而下江。去終古之所居兮。今逍遙而來東。羌靈魂之欲歸兮。何須臾而忘反。背夏浦而西

思兮哀故都之日遠登大墳以遠望兮聊以舒吾憂心

平樂兮悲江介之遺風當陵陽之焉至兮前疑懷王時放屈子於江南在今江西饒信地處鄂之東蓋作哀郢時也

頃襄再遷之乃在辰湘之間處鄂之南作涉江時也招魂曰路貫廬江兮左長薄廬江古即彭蠡之水故山曰廬山漢初廬江郡猶在江南後乃移郡江北地志云廬江出陵陽東南北入江蓋彭蠡東源出今饒州東界者古陵陽界及此故屈子曰當陵陽之焉至言不意其忽至此也其後陵陽南界乃益陵乃僅有今南陵銅陵縣耳運舟下浮者乘流下也上洞庭下江者言其處地之上下非屈子是時已南入洞庭也

淼南度之焉如曾不知夏之為邱兮孰兩東門之可蕪心

不怡之長久兮憂與憂其相接惟郢路之遼遠兮江與夏之不可

涉忽若去不信兮至今九年而不復慘鬱鬱而不通兮蹇侘傺而

含感外承歡之沟約兮謹荏弱而難持忠湛湛而願進兮妒披離

而鄣之彼堯舜之抗行兮瞭杳杳其薄天眾讒人之嫉妬兮被以

不慈之偽名憎愠愉之脩美兮好夫人之忼慨眾蹇蹶而日進兮

美超遠而踰邁亂曰曼余目以流觀兮冀壹反之何時鳥飛反故

鄉兮狐死必首邱信非吾罪而棄逐兮何日夜而忘之

抽思

心鬱鬱之憂思兮，獨永歎乎增傷。思蹇產之不釋兮，曼遭夜之方長。悲秋風之動容兮，何回極之浮浮。數惟蓀之多怒兮，傷余心之憂憂。願遙赴而橫奔兮，覽民尤以自鎮。結微情以陳辭兮，矯以遺夫美人。昔君與我成言兮，曰黃昏以爲期。羌中道而回畔兮，反旣有此他志。憍兮以其美好兮，覽余以其脩姱。與余言而不信兮，蓋爲余而造怒。願承聞而自察兮，心震悼而不敢。悲夷猶而冀進兮，心怛傷之憺憺。歷茲情以陳辭兮，蓀詳聾而不聞。固切人之不媚兮，眾果以我爲患。初吾所陳之耿著兮，豈至今其庸亡。言所陳成敗得失無不耿著其言猶在而至今不已驗乎何獨樂斯之謇謇兮，願蓀美之可完。望三五以爲像兮，指彭咸以爲儀。夫何極而不至兮，故遠聞而難虧。善不由外來兮，名不可以虛作。孰無施而有報兮，孰不實而有穫。少歌曰：與美人抽

怨兮。并日夜而無正。憍吾以其美好兮。敖朕辭而不聽。倡曰。有鳥

自南兮。來集漢北。好娉佳麗兮。胖獨處此異域。既惇獨而不羣兮。

又無良媒在其側。道遼遠而日忘兮。願自申而不得。望南山而流

涕兮。臨流水而太息。望孟夏之短夜兮。何晦明之若歲。惟郢路之

遼遠兮。魂一夕而九逝。此承上文言我初陳言明知施報之不爽而君乃不聽安得無禍乎懷玉入秦渡漢而北故託言有鳥而亦傷其南望郢而不得反

也。故曰。雖流放。瞻顧楚國。繫心懷王。不忘欲返。曾不知路之曲直兮。南指月與列星。願徑逝而不

得兮。魂識路之營營。何靈魂之信直兮。人之心不與吾心同理。弱

而媒不通兮。尙不知余之從容。言懷王以信直而為秦欺矣又無行理為道一言王尙不知余之心所謂以此見懷王之終不悟也懷王

昔者所用蓋皆小人為利者耳。一旦主遭憂辱則棄而忘之。冀如瑕生之於晉。惠子

展子鮮之推挽。衛獻者安可得哉。屈子所以痛心於理弱也。與離騷之理弱託意異矣。亂曰。長

瀨湍流。泝江潭兮。狂顧南行。聊以娛心兮。軫石威鬼。蹇吾願兮。超

同志度。行隱進兮。抵侗夷。猶宿北姑兮。煩冤督咨。實沛徂兮。愁歎

苦神。靈遙思兮。路遠處幽。又無行媒兮。道。作頌聊自救兮。懷王之

事不可

追矣。則作頌爲戒以救襄王。尚可及也。故曰冀幸君之一已。此篇悲傷懷王之拘困于秦。其辭致爲悽切。既自抒忠愛。亦所以厲頃襄報仇之心。而是時君臣方就逸樂。惡聞國恥。此令尹子蘭所以聞之。憂心不遂。斯言誰告兮。大怒也。

懷沙。

滔滔孟夏兮。草木莽莽。傷懷永哀兮。汨徂南土。眴兮杳杳。孔靜幽默。鬱結紆軫兮。離愍而長鞠。撫情效志兮。寃屈而自抑。刊方以爲圓兮。常度未替。易初本迪兮。君子所鄙。章畫志墨兮。前圖未改。內直質重兮。大人所賊。巧倖不斷兮。孰察其揆。正玄文處幽兮。蒙謂之不章。離婁微睇兮。瞽以爲無明。變白以爲黑兮。倒上以爲下。鳳皇在笱兮。雞鶩翔舞。同糝玉石兮。一槩而相量。夫惟黨人之鄙固兮。羌不知余之所臧。任重載盛兮。陷滯而不濟。懷瑾握瑜兮。窮不知所示。邑犬羣吠兮。吠所怪也。非俊疑桀兮。固庸態也。文質疏內兮。眾不知余之異采。材樸委積兮。莫知余之所有。重仁襲義兮。謹

厚以爲豐。重華不可遷兮。孰知余之從容。古固有不並兮。豈知其故也。湯禹久遠兮。邈不可慕也。懲違改忿兮。抑心而自彊。離慙而不遷兮。願志之有像。進路北次兮。日昧昧其將莫。舒憂娛哀兮。限之以大故。亂曰。浩浩沅湘。分流汨兮。修路幽拂。道遠忽兮。曾吟恆悲。永歎喟兮。世旣莫吾知。人心不可謂兮。懷情抱質。獨無匹兮。伯樂旣沒。驥將焉程兮。民生稟命。各有所錯兮。定心廣志。余何畏懼兮。知死不可讓。願勿愛兮。明告君子。吾將以爲類兮。

橘頌。

后皇嘉樹。橘徠服兮。受命不遷。生南國兮。深固難徙。更壹志兮。綠葉素榮。紛其可喜兮。曾枝剌棘。圜實搏兮。青黃雜糅。文章爛兮。精色內白。類任道兮。紛緼宜修。姱而不醜兮。嗟爾幼志。有以異兮。獨立不遷。豈不可喜兮。深固難徙。廓其無求兮。蘇世獨立。橫而不流。

兮閉心自慎終不過失兮秉德無私參天地兮願歲并謝與長友
兮淑離不淫梗其有理兮年歲雖少可師長兮行比伯夷置以爲
像兮蕭疑此篇尚在懷王朝初被讒時所作故首言后皇末言年歲雖少與涉江年既老
之時異矣而閉心自慎之語又若以辨釋上官所云每一令出平伐其功之篇體也

悲回風。

悲回風之搖蕙兮心冤結而內傷物有微而隕性兮聲有隱而先
倡夫何彭咸之造思兮暨志介而不忘萬變其情豈可蓋兮孰虛
僞之可長烏獸鳴以號羣兮草苴比而不芳魚葺鱗以自別兮蛟
龍隱其文章故荼薺不同畝兮蘭茝幽而獨芳惟佳人之永都兮
更統世以自況眇遠志之所及兮憐浮雲之相羊介眇志之所惑
兮竊賦詩之所明惟佳人之獨懷兮折芳椒以自處曾歔歔之嗟
嗟兮獨隱伏而思慮涕泣交而淒淒兮思不眠以至曙終長夜之
曼曼兮掩此哀而不去寤從容以周流兮聊逍遙以自恃傷太息

之愍憐兮。氣於邑而不可止。糾思心以爲纒兮。編愁苦以爲膺。折若木以蔽光兮。隨飄風之所仍。存髮髯而不見兮。心踴躍其若湯。撫佩衽以案志兮。超惘惘而遂行。歲習習其若頽兮。時亦冉冉而將至。蘋蘅槁而節離兮。芳已歇而不比。憐思心之不可懲兮。證此言之不可聊。寧溘死而流亡兮。不忍此心之常愁。孤子唵而投淚兮。放子出而不還。孰能思而不隱兮。昭彭咸之所聞。登石巒以遠望兮。路眇眇之默默。入景響之無應兮。聞省想而不可得。愁鬱鬱之無快兮。居戚戚而不可解。心鞿羈而不開兮。氣繚轉而自締。穆眇眇之無垠兮。莽芒芒之無儀。聲有隱而相感兮。物有純而不可爲。藐蔓蔓之不可量兮。縹綿綿之不可紆。愁悄悄之常悲兮。翩冥冥之不可娛。陵大波而流風兮。託彭咸之所居。上高巖之峭岸兮。處雌蜺之標顛。據青冥而攄虹兮。遂儻忽而捫天。吸湛露之浮涼。

兮。激凝霜之雰雰。依風穴以自息兮。忽傾寤以嬋媛。馮昆侖以瞰
霧兮。隱岐山之清江。憚涌湍之礚礚兮。聽波聲之洶洶。紛容容之
無經兮。罔芒芒之無紀。軋洋洋之無從兮。馳委移之焉止。飄幡幡
其上下兮。翼遙遙其左右。汜滴滴其前後兮。伴張弛之信期。觀炎
氣之相仍兮。窺煙液之所積。悲霜雪之俱下兮。聽潮水之相擊。借
光景以往來兮。施黃棘之枉策。求介子之所存兮。見伯夷之放迹。
心調度而不去兮。刻著志之無適。曰吾怨往昔之所冀兮。悼來者
之愁愁。浮江淮而入海兮。從子胥而自適。望大河之洲渚兮。悲申
徒之抗迹。驟諫君而不聽兮。任重石之何益。心絪結而不解兮。思
蹇產而不釋。

思美人

思美人兮。攬涕而竚眙。媒絕路阻兮。言不可結。而詒蹇蹇之煩冤。

兮。陷滯而不發。申旦以舒。中情兮。志沈苑而莫達。願寄言於浮雲兮。遇豐隆而不將。因歸鳥而致辭兮。羌迅高而難當。高辛之靈辰兮。遭玄鳥而致詒。欲變節以從俗兮。媿易初而屈志。獨歷年而離愍兮。羌馮心猶未化。寧隱閔而壽考兮。何變易之可爲。知前轍之不遂兮。未改此度。車旣覆而馬顛兮。蹇獨懷此異路。勒騏驥而更駕兮。造父爲我操之。遷逡次而勿驅兮。聊假日以須時。指嶓冢之西隈兮。與纁黃以爲期。開春發歲兮。白日出之悠悠。吾將蕩志而愉樂兮。遵江夏以娛憂。攬大薄之芳茝兮。琴長洲之宿莽。惜吾不及古人兮。吾誰與玩此芳草。解扁薄與雜菜兮。備以爲交佩。佩續紛以繚轉兮。遂萎絕而離異。吾且亶侗以娛憂兮。觀南人之變態。竊快在中心兮。揚厥馮而不竣。芳與澤其雜糅兮。羌芳華自中出。紛郁郁其遠烝兮。滿內而外揚。情與質信可保兮。羌居蔽而聞章。

令。薛。荔。以。爲。理。兮。憚。舉。趾。而。緣。木。因。芙蓉。以。爲。媒。兮。憚。褰。裳。而。濡。足。登。高。吾。不。說。兮。入。下。吾。不。能。固。朕。形。之。不。服。兮。然。容。與。而。狐。疑。廣。遂。前。畫。兮。未。改。此。度。也。命。則。處。幽。吾。將。罷。兮。願。及。白。日。之。未。莫。也。獨。熒。熒。而。南。行。兮。思。彭。咸。之。故。也。

惜往日

惜。往。日。之。曾。信。兮。受。命。詔。以。昭。時。奉。先。功。以。照。下。兮。明。法。度。之。嫌疑。國。富。強。而。法。立。兮。屬。貞。臣。而。日。嫉。秘密。事。之。載。心。兮。雖。過。失。猶弗。治。心。純。靡。而。不。泄。兮。遭。讒。人。而。嫉。之。君。含。怒。以。待。臣。兮。不。清。澂其。然。否。蔽。晦。君。之。聰。明。兮。虛。惑。誤。又。以。欺。弗。參。驗。以。考。實。兮。遠。遷臣。而。弗。思。信。讒。諛。之。溷。濁。兮。賊。氣。志。而。過。之。何。貞。臣。之。無。辜。兮。被讒。謗。而。見。尤。慙。光。景。之。誠。信。兮。身。幽。隱。而。備。之。臨。江。湖。之。玄。淵。兮。遂。自。忍。而。沈。流。卒。沒。身。而。絕。名。兮。惜。靡。君。之。不。昭。君。無。度。而。弗。察

兮。使芳草爲藪幽，焉舒情而抽信兮。恬死亡而不聊，獨鄣靡而蔽
隱兮。使貞臣而無由，聞百里之爲虜兮。伊尹烹於庖廚，呂望屠於
朝歌兮。甯戚歌而飯牛，不逢湯武與桓繆兮。世孰云而知之，吳信
讒而弗味兮。子胥死而後憂，介子忠而立枯兮。文君寤而追求，封
介山而爲之禁兮。報大德之優游，思久故之親身兮。因編素而哭
之，或忠信而死節兮。或訛謾而不疑，弗省察而按實兮。聽讒人之
虛辭，芳與澤其雜糅兮。孰申旦而別之，何芳草之早夭兮。微霜降
而下戒，諒聰不明而蔽靡兮。使讒諛而日得，自前世之嫉賢兮。謂
蕙若其不可佩，妒佳冶之芬芳兮。蓼母姣而自好，雖有西施之美
容兮。讒妬入以自代，願陳情以白行兮。得罪過之不意，情冤見之
日明兮。如列宿之錯置，乘騏驥而馳騁兮。無轡銜而自載，乘汜汭
以下流兮。無舟楫而自備，背法度而心治兮。辟與此其無異，盍溘

死○而○流○亡○兮○恐○禍○殃○之○有○再○不○畢○辭○而○赴○淵○兮○惜○靡○君○之○不○識○

Blank page with vertical lines.

辭賦類二

古文辭類纂六十三

屈原遠遊

悲時俗之迫阨兮，願輕舉而遠遊。質菲薄而無因兮，焉託乘而上浮。遭沈濁之汙穢兮，獨苑結其誰語。夜耿耿而不寐兮，魂營營而至曙。惟天地之無窮兮，哀人生之長勤。往者余弗及兮，來者吾不聞。步徙倚而遙思兮，怊惝恍而永懷。意荒忽而流蕩兮，心愁悽而增悲。神儵忽而不反兮，形枯槁而獨留。內惟省以端操兮，求正氣之所由。漠虛靜以恬愉兮，澹無爲而自得。聞赤松之清塵兮，願承風乎遺則。貴至人之休德兮，美往世之登仙。與化去而不見兮，名聲著而日延。奇傳說之託辰星兮，羨韓眾之得一。形穆穆以寢遠兮，離人羣而遁逸。因氣變而遂曾舉兮，忽神奔而鬼怪。時髣髴以遙見兮，精皎皎以往來。絕氛埃而淑郵兮，終不反其故都。免眾患

而不懼兮。世莫知其所如。恣天時之代序兮。曜靈曄而西征。微霜降而下淪兮。悼芳草之先零。聊仿佯而逍遙兮。永歷年而無成。誰可與玩斯遺芳兮。長鄉風而舒情。高陽邈以遠兮。余將焉所程。重曰。春秋忽其不淹兮。奚久留此故居。軒轅不可攀援兮。吾將從王喬而娛戲。餐六氣而飲沆瀣兮。漱正陽而含朝霞。保神明之清澂兮。精氣入而麤穢除。順凱風以從遊兮。至南巢而壹息。見王子而宿之兮。審壹氣之和德。曰道可受兮。而不可傳。其小無內兮。其大無垠。無涸而魂兮。彼將自然。壹氣孔神兮。于中夜存。虛以待之兮。無爲之先。庶類以成兮。此德之門。聞至貴而遂徂兮。忽乎吾將行。仍羽人于丹邱兮。雷不死之舊鄉。朝濯髮于湯谷兮。夕晞余身兮。九陽吸飛泉之微液兮。懷琬琰之華英。玉色頰以晚顏兮。精醇粹而始壯。質銷鑠以灼約兮。神要眇以淫放。嘉南州之炎德兮。麗桂

樹之冬榮山蕭條而無獸兮野寂漠其無人載營魄而登霞兮掩
浮雲而上征命天閔其開闕兮排闥闔而望子召豐隆使先導兮
問太微之所居集重陽入帝宮兮造旬始而觀清都朝發軔于太
儀兮夕始臨乎於微閭屯余車之萬乘兮紛容與而並馳駕八龍
之婉婉兮載雲旗之透蛇建雄虹之采旄兮五色雜而炫耀服偃
蹇以低昂兮驂連蜷以驕驚騎膠葛以雜亂兮班曼衍而方行撰
余轡而正策兮吾將過乎句芒歷太皓以右轉兮前飛廉以啟路
陽杲杲其未光兮陵天地以徑度風伯爲余先驅兮氛埃辟而清
涼鳳皇翼其承旂兮遇蓐收乎西皇擊彗星以爲旂兮舉斗柄以
爲麾叛陸離其上下兮遊驚霧之流波時曖曖其曠莽兮召玄武
而奔屬後文昌使掌行兮選署眾神以並轂路曼曼其脩遠兮徐
弭節而高厲左雨師使徑侍兮右雷公以爲衛欲度世以忘歸兮

意恣睢以揭擣內欣欣而自美兮聊媮娛以淫樂涉青雲以汎濫
兮忽臨睨夫舊鄉僕夫懷余心悲兮邊馬顧而不行思舊故以想
像兮長太息而掩涕汜容與而遐舉兮聊抑志而自弭指炎帝而
直馳兮吾將往乎南疑覽方外之荒忽兮沛澗養而自浮祝融戒
而蹕御兮騰告鸞鳥迎慮妃張咸池奏承雲兮二女御九韶歌使
湘靈鼓瑟兮令海若舞馮夷列螭象而並進兮形繆虬而透蛇雌
蜺便娟以會撓兮鸞鳥軒翥而翔飛音樂博衍無終極兮焉乃逝
以裴回舒并節以馳驚兮遠絕垠乎寒門軼迅風于清源兮從顛
項乎增冰歷玄冥以邪徑兮乘閒維以反顧召黔羸而見之兮爲
余先乎平路經營四荒兮周流六漠上至列缺兮降望大壑下崢
嶸而無地兮上寥廓而無天視儵忽而無見兮聽恂怳而無聞超
無爲以至清兮與太初而爲鄰

屈原卜居。

屈原既放三年不得復見。竭智盡忠，蔽鄣於讒，心煩意亂，不知所從。乃往見太卜鄭詹尹曰：「余有所疑，願因先生決之。」詹尹乃端策拂龜曰：「君將何以教之？」屈原曰：「吾寧悃悃款款，朴以忠乎？將送往勞來，斯無窮乎？寧誅鋤草茅以力耕乎？將遊大人以成名乎？寧正言不諱，以危身乎？將從俗富貴，以媮生乎？寧超然高舉，以保真乎？將呴訾慄斯，喔咿嚅唳，以事婦人乎？寧廉潔正直，以自清乎？將突梯滑稽，如脂如韋，以絜楹乎？寧昂昂若千里之駒乎？將汜汜若水中之鳧與波上下，偷以全吾軀乎？寧與騏驥抗軛乎？將隨鴛馬之迹乎？寧與黃鵠比翼乎？將與雞鶩爭食乎？此孰吉孰凶？何去何從？世溷濁而不清，蟬翼爲重，千鈞爲輕。黃鐘毀棄，瓦釜雷鳴。讒人高張，賢士無名。吁嗟默默兮，誰知吾之廉貞？詹尹乃釋策而謝曰：「夫

尺有所短，寸有所長，物有所不足，智有所不明，數有所不逮，神有所不通，用君之心，行君之意，龜策誠不能知此事。

屈原漁父。

屈原既放，遊于江潭，行吟澤畔，顏色憔悴，形容枯槁。漁父見而問之曰：子非三閭大夫與？何故至于斯？屈原曰：世人皆濁，我獨清，眾人皆醉，我獨醒，是以見放。漁父曰：聖人不凝滯于物，而能與世推移，世人皆濁，何不淈其泥而揚其波？眾人皆醉，何不餽其糟而歠其醑？何故深思高舉，自令放為？屈原曰：吾聞之，新沐者必彈冠，新浴者必振衣，安能以身之察察，受物之汶汶者乎？寧赴湘流，葬于江魚之腹中，安能以皓皓之白，蒙世之塵埃乎？漁父莞爾而笑，鼓枻而去，乃歌曰：滄浪之水清兮，可以濯我纓；滄浪之水濁兮，可以濯我足。遂去，不復與言。

終

辭賦類三

古文辭類纂六十四

宋玉九辯

悲哉秋之爲氣也。蕭瑟兮。草木搖落而變衰。慄慄兮。若在遠行。登山臨水兮。送將歸。沈寥兮。天高而氣清。淒淒兮。收潦而水清。慙悽增歛兮。薄寒之中人。愴愴兮。去故而就新。坎壈兮。貧士失職。而志不平。廓落兮。羈旅而無友。生惆悵兮。而私自憐。燕翩翩其辭歸兮。蟬寂寞而無聲。雁噦噦而南遊兮。鷓鴣啁哳而悲鳴。獨申旦而不寐兮。哀蟋蟀之宵征。時蹙蹙而過中兮。蹇淹留而無成。悲憂窮蹙兮。獨處廓。有美一人兮。心不釋。去鄉離家兮。來遠客。超逍遙兮。今焉薄。專思君兮。不可化。君不知兮。可奈何。蓄怨兮。積思。心煩懣兮。忘食事。願一見兮。道余意。君之心兮。與余異。車駕兮。竭而歸。不得見兮。心悲。倚結軫兮。太息。涕潺湲兮。霑軾。慷慨絕兮。不

得中。督亂兮。迷惑。私自憐兮。何極。心怛怛兮。諒直。皇天平分。四時兮。竊獨悲。此凜秋。白露既下降。百草兮。奄離披。此梧楸。去白日之昭昭兮。襲長夜之悠悠。離芳謁之方壯兮。余委約而悲愁。秋既先戒以白露兮。冬又申之以嚴霜。收恢台之孟夏兮。然坎條而沈藏。葉菸邑而無色兮。枝頽掣而交橫。顏淫溢而將罷兮。柯彷彿而委黃。葡櫛樛之可哀兮。形銷鑠而瘀傷。惟其紛糅而將落兮。恨其失時而無當。寧駢轡而下節兮。聊逍遙以相羊。歲忽忽而適盡兮。恐余壽之弗將。悼余生之不時兮。逢此世之狂攘。澹容與而獨倚兮。蟋蟀鳴此西堂。心怵惕而震盪兮。何所憂之多方。仰明月而太息兮。步列星而極明。竊悲夫。蕙華之曾敷兮。紛旖旎乎都房。何曾華之無實兮。從風雨而飛颺。以爲君獨服此蕙兮。嗟無以異於眾芳。閔奇思之不通兮。

將去君而高翔。心閔憐之慘悽兮。願一見而有明。重無怨而生離兮。中結軫而增傷。豈不鬱陶而思君兮。君之門以九重。猛犬狺狺而迎吠兮。關梁閉而不通。皇天淫溢而秋霖兮。后土何時而得乾塊。獨守此無澤兮。仰浮雲而永歎。

何時俗之工巧兮。背繩墨而改錯。卻騏驥而不乘兮。策駑駘而取路。當世豈無騏驥兮。誠莫之能善御。見執轡者非其人兮。故駟跳而遠去。鳧鴈皆喑。夫梁藻兮。鳳愈飄翔而高舉。圓鑿而方枘兮。吾固知其鉏鋸而難入。眾鳥皆有所登棲兮。鳳獨遑遑而無所集。願銜枚而無言兮。嘗被君之渥洽。太公九十乃顯榮兮。誠未遇其匹。合謂騏驥兮。安歸。謂鳳凰兮。安棲。變古易俗兮。世衰。今之相者兮。舉肥騏驥。伏匿而不見兮。鳳凰高飛而不下。鳥獸猶知懷德兮。何云賢士之不處。驥不驟進而求服兮。鳳亦不貪餒而妄食。君棄遠

而不察兮。雖願忠其焉得。欲寂寞而絕端兮。竊不敢忘初之厚德。獨悲愁其傷人兮。馮鬱鬱其何極。

霜露慘淒而交下兮。心尙幸其弗濟。霰雪雰糅其增加兮。乃知遭命之將至。願微幸而有待兮。汨莽莽兮與桎草同死。願自直而徑往兮。路壅絕而不通。欲循道而平驅兮。又未知其所從。然中路而迷惑兮。自厭按而學誦。性愚陋以褊淺兮。信未達乎從容。竊美申包胥之氣晟兮。恐時世之不固。何時俗之工巧兮。滅規矩而改鑿。獨耿介而不隨兮。願慕先聖之遺教。處濁世而顯榮兮。非余心之所樂。與其無義而有名兮。寧窮處而守高。食不媮而爲飽兮。衣不苟而爲溫。竊慕詩人之遺風兮。願託志乎素餐。蹇充倔而無端兮。汨莽莽而無垠。無衣裘以御冬兮。恐溘死而不得見乎陽春。覩杪秋之遙夜兮。心繚悞而有哀。春秋遑遑而日高兮。然惆悵而

自悲四時遞來而卒歲兮。陰陽不可與儷偕。白日晼晚其將入兮。明月銷鑠而滅毀。歲忽忽而適盡兮。老冉冉而愈弛。心搖悅而日幸兮。然怊悵而無冀。中憺惻之悽愴兮。長太息而增欷。年洋洋以日往兮。老嶮廓而無處。事疊疊而覲進兮。蹇淹留而躊躇。

何汜濫之浮雲兮。焱靡蔽此明月。忠昭昭而願見兮。然露晞而莫達。願皓日之顯行兮。雲蒙蒙而蔽之。竊不自料而願忠兮。或黜黜而汙之。堯舜之抗行兮。瞭冥冥而薄天。何險巇之嫉妒兮。被以不慈之僞名。彼日月之照明兮。尙黯黹而有瑕。何況一國之事兮。亦多端而膠加。被荷禡之晏晏兮。然潢洋而不可帶。旣驕美而伐武兮。負左右之耿介。憎愠愉之修美兮。好夫人之慷慨。眾踳蹀而日進兮。美超遠而逾邁。農夫輟耕而容與兮。恐田野之蕪穢。事縣縣而多私兮。竊悼後之危敗。世雷同而炫曜兮。何毀譽之昧昧。今修

節而窺鏡兮。後尙可以竄藏。願寄言夫流星兮。羌儵忽而難當。卒
靡蔽此浮雲兮。下暗漠而無光。

堯舜皆有所舉任兮。故高枕而自適。諒無怨於天下兮。心焉取此
怵惕。乘騏驥之瀏瀏兮。馭安用夫強策。諒城郭之不足恃兮。雖重
介之何益。邇翼翼而無終兮。恇惛惛而愁約。生天地之若過兮。功
不成而無效。願沈滯而不見兮。尙欲布名乎天下。然潢洋而不遇
兮。直恂愁而自苦。莽洋洋而無極兮。忽翱翔之焉薄。國有驥而不
知乘兮。焉皇皇而更索。甯戚謳於車下兮。桓公聞而知之。無伯樂
之善相兮。今誰使乎訾之。罔流涕以聊慮兮。惟著意而得之。紛恇
恇之願忠兮。妒被離而鄣之。願賜不肖之軀而別離兮。放遊志乎
雲中。乘精氣之搏搏兮。驚諸神之湛湛。騷白霓之習習兮。歷羣靈
之豐豐。左朱雀之茈茈兮。右蒼龍之躍躍。屬雷師之闐闐兮。道飛

廉之衙衙前輕鯨之鏘鏘兮後輜檠之從從載雲旗之委蛇兮扈
屯騎之容容計專專之不可化兮願遂摧而爲臧賴皇天之厚德
兮還及君之無恙

宋玉風賦

。。

楚襄王遊於蘭臺之宮宋玉景差侍有風颯然而至王乃披襟而
當之曰快哉此風寡人所與庶人共者邪宋玉對曰此獨大王之
風耳庶人安得而共之王曰夫風者天墜之氣溥暢而至不擇貴
賤高下而加焉今子獨以爲寡人之風豈有說乎宋玉對曰臣聞
於師枳句來巢空穴來風其所託者然則風氣殊焉王曰夫風始
安生哉宋玉對曰夫風生於地起於青蘋之末侵淫谿谷盛怒於
土囊之口緣太山之阿舞於松柏之下飄忽泐滂激揚燁怒眈眈
雷聲迴穴錯迕壓石伐木梢殺林莽至其將衰也被麗披離衝孔

動。健。胸。渙。粲。爛。離。散。轉。移。故。其。清。涼。雄。風。則。飄。舉。升。降。乘。陵。高。城。
入。於。深。宮。邸。華。葉。而。振。氣。徘徊。於。桂。椒。之。間。翱翔。於。激。水。之。上。將。
擊。芙。蓉。之。精。獵。蕙。草。離。秦。蕪。槩。新。夷。被。萑。楊。迴。穴。衝。陵。蕭。條。眾。芳。
然。後。徜徉。中。庭。北。上。玉。堂。躋。於。羅。幃。經。於。洞。房。迺。得。爲。大。王。之。風。
也。故。其。風。中。人。狀。直。慄。悽。慄。清。涼。增。歆。清。清。泠。泠。愈。病。析。醒。發。
明。耳。目。寧。體。便。人。此。所。謂。大。王。之。雄。風。也。王。曰。善。哉。論。事。夫。庶。人。
之。風。豈。可。聞。乎。宋。玉。對。曰。夫。庶。人。之。風。塤。然。起。於。窮。巷。之。閒。堀。堦。
揚。塵。勃。鬱。煩。冤。衝。孔。襲。門。動。沙。堞。吹。死。灰。駭。溷。濁。揚。腐。餘。邪。薄。入。
甕。牖。至。於。室。廬。故。其。風。中。人。狀。直。慄。溷。鬱。邑。毆。溫。致。溼。中。心。慘。怛。
生。病。造。熱。中。脣。爲。胗。得。目。爲。眦。啗。齧。噉。嘔。死。生。不。卒。此。所。謂。庶。人。
之。雌。風。也。

宋玉高唐賦。

昔者楚襄王與宋玉遊于雲夢之臺望高唐之觀其上獨有雲氣
崒兮直上忽兮改容須臾之間變化無窮王問玉曰此何氣也玉
對曰所謂朝雲者也王曰何謂朝雲玉曰昔者先王嘗遊高唐怠
而晝寢夢見一婦人曰妾巫山之女也爲高唐之客聞君遊高唐
願薦枕席王因幸之去而辭曰妾在巫山之陽高邱之岵且爲朝
雲莫爲行雨朝朝莫莫陽臺之下旦朝視之如言故爲立觀號曰
朝雲玉曰朝雲始出狀若何也玉對曰其始出也曄兮若松栴其
少進也晰兮若姣姬揚袂鄣日而望所思忽兮改容偈兮若駕駟
馬建羽旗湫兮如風淒兮如雨風止雨霽雲無處所王曰寡人方
今可以遊乎玉曰可王曰其何如矣玉曰高矣顯矣臨望遠矣廣
矣普矣萬物祖矣上屬於天下見於淵珍怪奇偉不可稱論王曰
試爲寡人賦之玉曰唯唯惟高唐之大體兮殊無物類之可儀比

巫山赫其無疇兮。道互折而曾累。登巉巖而下望兮。臨大坻之稽
水。遇天雨之新霽兮。觀百谷之俱集。漚洶洶其無聲兮。潰淡淡而
並入。滂洋洋而四施兮。翫湛湛而不止。長風至而波起兮。若麗山
之孤畝。勢薄岸而相擊兮。隘交引而卻會。崒中怒而特高兮。若浮
海而望碣石。礫礫而相摩兮。熿震天之磻磻。巨石溺溺之澆澆。
兮。沫潼潼而高厲。水澹澹而盤紆兮。洪波淫淫之浴裔。奔揚踊而
相擊兮。雲興聲之霈霈。猛獸驚而跳駭兮。妄奔走而馳邁。虎豹豺
兕。失氣恐喙。鵬鵠鷹鷂。飛揚伏竄。股戰脅息。安敢妄擊。於是水蟲
盡暴。乘渚之陽。鼃鼃鱸鮪。交積縱橫。振鱗奮翼。蜷蜷蜿蜿。中阪遙
望。玄木冬榮。煌煌熒熒。奪人目精。爛兮若列星。曾不可殫形。榛林
鬱盛。葩葉覆蓋。雙椅垂房。糾枝還會。徙靡澹淡。隨波閭闔。東西施
翼。猗猗豐沛。綠葉紫裏。朱莖白蒂。纖條悲鳴。聲似竽籟。清濁相和。

五變四會，感心動耳。迴腸傷氣，孤子寡婦，寒心酸鼻。長吏隳官，賢士失志，愁思無已。歎息垂淚，登高遠望，使人心瘁。盤岸噴沓，磔陳磴磴，盤石險峻，傾崎崕隤。巖嶇參差，縱橫相追。陬互橫牻，背穴偃蹠。交加累積，重疊增益。狀似砥柱，在巫山之下。仰視山巔，肅何芊芊。炫耀虹蜺，俯視晴嶽。窈窕窈冥，不見其底。虛聞松聲，傾岸洋洋。立而熊經，久而不去。足盡汗出，悠悠忽忽，怛悵自失。使人心動，無故自恐。賁育之斷，不能爲勇。卒愕異物，不知所出。縱縱莘莘，若生於鬼。若出於神，狀似走獸，或象飛禽。譎詭奇偉，不可究陳。上至觀側，地蓋底平。箕踵漫衍，芳草羅生。秋蘭芷蕙，江離載菁。青荃夜干，揭車苞并。薄草靡靡，聯延天天。越香掩掩，眾雀嗷嗷。雌雄相失，哀鳴相號。王睢鸕黃，正冥楚鳩。姊歸思婦，垂雞高巢。其鳴喈喈，當羊遨遊。更唱迭和，赴曲隨流。有方之士，羨門高谿。上成鬱林，公樂聚

穀進純犧，禱璇室，醮諸神，禮太一，傳祝已具，言辭已畢，王乃乘玉輿，駟蒼螭，垂旒旌，旆合諧，絀大弦而雅聲流，冽風過而增悲哀，於是調謳，令人憚憚，慄脅息增欷，於是乃縱獵者，基址如星，傳言羽獵，銜枚無聲，弓弩不發，罟罕不傾，涉滌滌，馳萃萃，飛鳥未及起，走獸未及發，弭節奄忽，蹕足灑血，舉功先得，獲車已實，王將欲往見之，必先齋戒，差時擇日，簡輿玄服，建雲旆，蜺爲旌，翠爲蓋，風起雨止，千里而逝，蓋發蒙，往自會，思萬方，憂國害，開賢聖，輔不逮，九竅通鬱，精神察，躑延年益壽千萬歲。

宋玉神女賦。

楚襄王與宋玉游於雲夢之浦，使玉賦高堂之事，其夜玉寢，夢與神女遇，其狀甚麗，玉異之，明日以白王，王曰：其夢若何？玉對曰：晡夕之後，精神恍惚，若有所喜，紛紛擾擾，未知何意，目色鬢鬢，乍若

有記見一婦人狀甚奇異寐而夢之寤不自識罔兮不樂悵爾失志於是撫心定氣復見所夢王曰狀何如也玉曰茂矣美矣諸好備矣盛矣麗矣難測究矣上古既無世所未見環姿瑋態不可勝贊其始來也耀乎若白日初出照屋梁其少進也皎若明月舒其光須臾之間美貌橫生曄兮如花温乎如瑩五色並馳不可殫形詳而視之奪人目精其盛飾也則羅紉綺績盛文章極服妙采照萬方振繡衣被袿裳穠不短纖不長步裔裔兮曜殿堂忽兮改容婉若游龍粲雲翔媚被服悅薄裝沐蘭澤含若芳性和適宜侍旁順序卑調心腸王曰若此盛矣試爲寡人賦之玉曰唯唯夫何神女之姣麗兮含陰陽之渥飾被華藻之可好兮若翡翠之奮翼其象無雙其美無極毛嬙鄠袂不足程式西施掩面比之無色近之既妖遠之有望骨法多奇應君之相視之盈目孰者克尙私心獨

悅樂之無量交希恩疎不可盡暢他人莫睹玉覽其狀其狀峩峩
何可極言貌豐盈以莊姝兮苞溫潤之玉顏眸子炯其精朗兮瞭
多美而可觀眉聯娟以蛾揚兮朱脣的其若丹素質幹之醲實兮
志解泰而體閒旣婉孌於幽靜兮又婆娑乎人間宜高殿以廣意
兮翼放縱而綽寬動霧縠以徐步兮拂墀聲之珊珊望余帷而延
視兮若流波之將瀾奮長袖以正衽兮立躑躅而不安澹清靜其
情慙兮性沈詳而不煩時容與以微動兮志未可乎得原意似近
而旣遠兮若將來而復旋寒余疇而請御兮願盡心之惓惓懷貞
亮之潔清兮卒與我乎相難陳嘉辭而云對兮吐芬芳其若蘭精
交結以來往兮心凱康以樂歡神獨亨而未結兮魂煢煢以無端
含然諾其不分兮喟揚音而哀歎擷薄怒以自持兮曾不可乎犯
干於是搖珮飾鳴玉鸞整衣服斂容顏顧女師命太傅歡情未接

將辭而去遷延引身不可親附似逝未行中若相首目略微眄精
彩相授志態橫出不可勝記意離未絕神心怖覆禮不違訖辭不
及究願假須臾神女稱遽徊腸傷氣顛倒失據闇然而冥忽不知
處情獨私懷誰者可語惆悵垂涕求之至曙

宋玉登徒子好色賦。

大夫登徒子侍於楚襄王短宋玉曰玉爲人體貌閒麗口多微辭
又性好色願王勿與出入後宮王以登徒子之言問於宋玉玉曰
體貌閒麗所受於天也口多微辭所學於師也至於好色臣無有
也王曰子不好色亦有說乎有說則止無說則退玉曰天下之佳
人莫若楚國楚國之麗者莫若臣里臣里之美者莫若臣東家之
子臣東家之子增之一分則太長減之一分則太短著粉則太白
施朱則太赤眉如翠羽肌如白雪腰如束素齒如含貝嫣然一笑

惑陽城迷下蔡。然此女登牆闚臣三年。至今未許也。登徒子則不然。其妻蓬頭鬢耳。齟脣歷齒。旁行踞屣。又疥且痔。登徒子悅之。使有五子。王孰察之。誰爲好色者矣。是時秦章華大夫在側。因進而稱曰。今夫宋玉盛稱鄰之女。以爲美色。愚亂之邪。臣自以爲守德。謂不如彼矣。言玉之意以爲美色必能愚亂人。那臣之守德尙不至如彼所慮也。且夫南楚窮巷之妾。焉足爲大

王言乎。若臣之陋。目所曾睹者。未敢云也。王曰。試爲寡人說之。大夫曰。唯唯。臣少曾遠遊。周覽九土。足歷五都。出咸陽。熙邯鄲。從容鄭衛。溱洧之間。是時向春之末。迎夏之陽。鷓鴣喈喈。羣女出桑。此郊之姝。華色含光。體美容冶。不待飾裝。臣觀其麗者。因稱詩曰。遵大路兮。攬子祛。贈以芳華。辭甚妙。於是處子悅。若有望而不來。忽若有來而不見。意密體疏。俯仰異觀。含喜微笑。竊視流眄。復稱詩曰。寤春風兮。發鮮榮。潔齋侯兮。惠音聲。贈我如此兮。不如無生。因

遷延而辭避，蓋徒以微辭相感動，精神相依憑，目欲其顏，心願其義，揚詩守禮，終不過差，故足稱也。於是楚王稱善，宋玉遂不退。

宋玉對楚王問。

楚襄王問於宋玉曰：先生其有遺行與？何士民眾庶不譽之甚也？宋玉對曰：唯，然有之。願大王寬其罪，使得畢其辭。客有歌於郢中者，其始曰：下里巴人，國中屬而和者數千人；其爲陽阿薤露，國中屬而和者數百人；其爲陽春白雪，國中屬而和者不過數十人；引商刻羽，雜以流徵，國中屬而和者不過數人而已。是其曲彌高，其和彌寡。故鳥有鳳而魚有鯤，鳳凰上擊九千里，絕雲霓，負蒼天，足亂浮雲，翱翔乎杳冥之上；夫藩籬之鷄，豈能與之料天地之高哉？鯤魚朝發崑崙之墟，暴鬣于碣石，暮宿于孟諸，夫尺澤之鯢，豈能與之量江海之大哉？故非獨鳥有鳳而魚有鯢也，士亦有之。夫聖

人瑰意琦行超然獨處世俗之民又安知臣之所爲哉

楚人以弋說頃襄王。

楚人有好以弱弓微繳加歸鴈之上者頃襄王聞召而問之對曰小臣之好射騏鴈羅鷺小矢之發也何足爲大王道也且稱楚之大因大王之賢所弋非直此也昔者三王以弋道德五霸以弋戰國故秦魏燕趙者騏鴈也齊魯韓衛者青首也鄒費邾邳者羅鷺也外其餘則不足射者見鳥六雙以王何取王何不以聖人爲弓以勇士爲繳時張而射之此六雙者可得而囊載也其樂非特朝夕之樂也其獲非特鳧雁之實也王朝張弓而射魏之大梁之南加其右臂而徑屬之於韓則中國之路絕而上蔡之郡壞矣還射圍之東解魏左肘而外擊定陶則魏之東外棄而大宋方與二郡者舉矣且魏斷二臂顛越矣膺擊鄰國大梁可得而有也王請繳

不厭則出寶弓。著新繳射。噉鳥於東海。還蓋長城以爲防。朝射東
莒。夕發。沮邱夜加。卽墨。顧據午道。則長城之東收。而太山之北舉
矣。西結境於趙。而北達於燕。三國布。狐則從不待約。而可成也。北
遊目於燕之遼東。而南登望於越之會稽。此再發之樂也。若夫泗
上十二諸侯。左縈而右拂之。可一旦而盡也。今秦破韓以爲長憂。
得列城而不敢守也。伐魏而無功。擊趙。顧病則秦魏之勇力屈矣。
楚之故地。漢中析酈。可得而復有也。王出寶弓。著新繳。涉郟塞而
待秦之倦也。山東河內可得而一也。勞民休眾。南面稱王矣。故曰
秦爲大鳥。負海內而處東面。而立左臂據趙之西南。右臂傅楚。鄢
郢膺擊韓魏。垂頭中國。處旣形便。勢有地利。奮翼鼓狐。方三千里。
則秦未可得獨招而夜射也。欲以激怒襄王。故對以此言。襄王因

召與語遂言曰夫先王爲秦所欺而客死於外怨莫大焉今以匹夫有怨尙有報萬乘白公子胥是也今楚之地方五千里帶甲百萬猶足以踴躍中野也而坐受困臣竊爲大王弗取也於是頃襄王遣使於諸侯復爲從欲以伐秦

莊辛說襄王。

莊辛謂楚襄王曰君王左州侯右夏侯輦從鄢陵君與壽陵君專淫泆侈靡不顧國政郢都必危矣襄王曰先生老悖乎將以爲楚國妖祥乎莊辛曰臣誠見其必然者也非敢以爲國妖祥也君王卒幸四子者不衰楚國必亡矣臣請避於趙淹畱以觀之莊辛去之趙畱五月秦果舉鄢郢巫上蔡陳之地襄王流揜於城陽於是使人發騶徵莊辛於趙莊辛曰諾莊辛至襄王曰寡人不能用先生之言今事至於此爲之奈何莊辛對曰臣聞鄙語曰見兔而顧

犬未爲晚也。亡羊而補牢，未爲遲也。臣聞昔湯武以百里昌，桀紂以天下亡。今楚國雖小，絕長續短，猶以數千里，豈特百里哉？王獨不見夫蜻蛉乎？六足四翼，飛翔乎天地之間，俛啄蚤蚋而食之，仰承甘露而飲之，自以爲無患，與人無爭也。不知夫五尺童子，方將調飴膠絲，加已乎四仞之上，而下爲螻蟻食也。夫蜻蛉其小者也，黃雀因是以俯噉白粒，仰棲茂樹，鼓翅奮翼，自以爲無患，與人無爭也。不知夫公子王孫，左挾彈，右攝丸，將加已乎十仞之上，以其類爲招，晝游乎茂樹，夕調乎酸鹹，倏忽之間，墜於公子之手。夫黃雀其小者也，黃鵠因是以游乎江海，淹乎大沼，俯噉鱖鯉，仰鬻陵衡，奮其六翮而凌清風，飄颻乎高翔，自以爲無患，與人無爭也。不知夫射者，方將修其矰廬，治其繪繳，將加已乎百仞之上，被礪磻，引微繳，折清風而抔矣。故晝游乎江湖，夕調乎鼎鼐，夫黃鵠其小

者也。蔡靈侯之事，因是以南游乎高陂，北游乎巫山，飲茹溪之流，食湘波之魚，左抱幼妾，右擁嬖女，與之馳騁乎高蔡之中，而不以國家爲事，不知夫子發方受命乎靈王，繫已以朱絲而見之也。蔡靈侯之事，其小者也。君王之事，因是以左州侯，右夏侯，輦從鄢陵君，與壽陵君，飯封祿之粟，而載方府之金，與之馳騁乎雲夢之中，而不以天下國家爲事，而不知夫穰侯方受命乎秦王，填黽塞之內，而投已乎黽塞之外。襄王聞之，顏色變作，身體戰慄，于是乃以執珪而授之爲陽陵君，與淮北之地。

爾按以弋說襄王及莊辛篇此與漁父宋玉對楚王東方客難同類並是設辭乃太史公

褚先生劉子政悉載敘之以爲事實爲失其旨已

辭賦類四

古文辭類纂六十五

賈生惜誓。

惜余年老而日衰兮，歲忽忽而不反。登蒼天而高舉兮，歷眾山而日遠。觀江河之紆曲兮，離四海之霑濡。攀北極而一息兮，吸沆瀣以充虛。飛朱鳥使先驅兮，駕太乙之象輿。蒼龍蚴蚪於左驂兮，白虎騁而爲右馱。建日月以爲蓋兮，載玉女於後車。馳驚於杳冥之中兮，休息崑崙之墟。樂窮極而不厭兮，願從容乎神明。涉丹水而馳騁兮，右大夏之遺風。黃鵠之一舉兮，知山川之紆曲。再舉兮，睹天地之圓方。臨中國之眾人兮，託同飈乎尙羊。乃至少原之壘兮，赤松王喬皆在旁。二子擁瑟而調均兮，予因稱乎清商。澹然而自樂兮，吸眾氣而翱翔。念我長生而久僊兮，不如反予之故鄉。黃鵠後時而寄處兮，鷗臯羣而制之。神龍失水而陸居兮，爲螻蟻之

所裁。夫黃鵠神龍猶如此兮。況賢者之逢亂世哉。壽冉冉而日衰兮。固儻同而不息。俗流從而不止兮。眾枉聚而矯直。或偷合而苟進兮。或隱居而深藏。苦稱量之不審兮。同權概而就衡。或推逐而苟容兮。或直言之諤諤。傷誠是之不察兮。并芻茅絲以爲索。方世俗之幽昏兮。眩白黑之美惡。放山淵之龜玉兮。相與貴夫礫石。梅伯數諫而至醢兮。來革順志而用國。悲仁人之盡節兮。反爲小人之所賊。比干忠諫而剖心兮。箕子被髮而佯狂。水背流而源竭兮。木去根而不長。非重軀以慮難兮。惜傷身之無功。已矣哉。獨不見夫鸞鳳之高翔兮。乃集大皇之壑。循四極而回周兮。見盛德而後下。彼聖人之神德兮。遠濁世而自藏。使麒麟可得羈而係兮。又以異乎犬羊。

賈生鵬鳥賦

有序。。

古文讀本卷六十五

誼爲長沙王傅三年有鵬鳥飛入誼舍止于坐隅鵬似鴟不祥鳥也誼旣以謫居長沙長沙卑澤誼自傷悼以爲壽不得長乃爲賦以自廣其辭曰

單闕之歲兮四月孟夏庚子日斜兮鵬集予舍止於坐隅兮貌甚閒暇異物來萃兮私怪其故發書占之兮讖言其度曰野鳥入室主人將去請問子鵬子去何之吉乎告我凶言其災淹速之度兮語余其期鵬乃歎息舉首奮翼口不能言請對以臆曰萬物變化兮固無休息幹流而遷兮或推而還形氣轉續兮變化而螭沕穆無窮兮胡可勝言禍兮福所倚福兮禍所伏憂喜聚門兮吉凶同域彼吳疆大兮夫差以敗越棲會稽兮句踐霸世斯遊遂成兮卒被五刑傳說胥靡兮乃相武丁夫禍之與福兮何異糾纏命不可說兮孰知其極水激則旱兮矢激則遠萬物同薄兮振盪相轉雲

蒸雨降兮糾錯相紛。大鈞播物兮。塊坱無垠。天不可預慮兮。道不可預謀。遲速有命兮。焉識其時。且夫天地爲鑪兮。造化爲工。陰陽爲炭兮。萬物爲銅。合散消息兮。安有常則。千變萬化兮。未始有極。忽然爲人兮。何足控搏。化爲異物兮。又何足患。小智自私兮。賤彼貴我。達人宏觀兮。物無不可。貪夫徇財兮。烈士徇名。夸者死權兮。品庶每生。怵迫之徒兮。或趨西東。大人不曲兮。意變齊同。愚士繫俗兮。窘若囚拘。至人遺物兮。獨與道俱。眾人惑惑兮。好惡積億。真人恬漠兮。獨與道息。釋智遺形兮。超然自喪。寥廓忽荒兮。與道翱翔。乘流則逝兮。得坻則止。縱軀委命兮。不私與已。其生兮若浮。其死兮若休。澹乎若深淵之靜。泛乎若不繫之舟。不以生故自賈兮。養空而游。德人無累兮。知命不憂。細故蒂芥兮。何足以疑。

枚叔七發。

楚太子有疾而吳客往問之曰伏聞太子玉體不安亦少閒乎太子曰憊謹謝客客因稱曰今時天下安寧四宇和平太子方富於年意者久耽安樂日夜無極邪氣襲逆中若結轆紛屯澹淡噓唏煩醒惕惕怵怵臥不得眠虛中重聽惡聞人聲精神越渫百病咸生聰明眩曜悅怒不平久執不廢大命乃傾太子豈有是乎太子曰謹謝客賴君之力時時有之然未至於是也客曰今夫貴人之子必宮居而閨處內有保母外有傅父欲交無所飲食則溫淳甘臠腥醲肥厚衣裳則雜暹曼煖燁燦熱暑雖有金石之堅猶將銷鑠而挺解也況其在筋骨之間乎哉故曰縱耳目之欲恣支體之安者傷血脈之和且夫出輿入輦命曰蹙痿之機洞房清宮命曰寒熱之媒皓齒蛾眉命曰伐性之斧甘脆肥膿命曰腐腸之藥今太子膚色靡曼四支委隨筋骨挺解血脈淫濯手足惰羸越女侍

前齊姬奉後往來遊讌縱恣乎曲房隱閒之中此甘餐毒藥戲猛獸之爪牙也所從來者至深遠淹滯永久而不廢雖令扁鵲治內巫咸治外尙何及哉今如太子之病者獨宜世之君子博見強識承閒語事變度易意常無離側以爲羽翼淹沈之樂浩唐之心遁佚之志其奚由至哉太子曰諾病已請事此言客曰今太子之病可無藥石針刺灸療而已可以要言妙道說而去也不欲聞之乎太子曰僕願聞之

客曰龍門之桐高百尺而無枝中鬱結之輪菌根扶疏以分離上有千仞之峰下臨百丈之谿湍流遡波又澹淡之其根半死半生冬則烈風漂霰飛雪之所激也夏則雷霆霹靂之所感也朝則鸚黃鴉鳴焉暮則羈雌迷鳥宿焉獨鵠晨號乎其上鷓鴣哀鳴翔乎其下於是背秋涉冬使琴擊斫斬以爲琴野繭之絲以爲絃孤

子之鉤以爲隱，九寡之珥以爲約，使師堂操暢，伯子牙爲之歌，歌曰：麥秀漸兮雉朝飛，向虛壑兮背槁槐，依絕區兮臨迴溪，飛鳥聞之翕翼而不能去，野獸聞之垂耳而不能行，蛟螭蠖蟻聞之柱喙而不能前，此亦天下之至悲也。太子能強起聽之乎？太子曰：僕病未能也。

客曰：牒牛之腴，菜以荀蒲，肥狗之和，冒以山膚，楚苗之實，安胡之飯，搏之不解，一噉而散，於是使伊尹煎熬，易牙調和，熊蹯之臠，勺藥之醬，薄耆之炙，鮮鯉之膾，秋黃之蘇，白露之茹，蘭英之酒，酌以滌口，山梁之餐，豢豹之胎，小飯大歡，如湯沃雪，此亦天下之至美也。太子能強起嘗之乎？太子曰：僕病未能也。

客曰：鍾岱之牡，齒至之車，前似飛鳥，後類距虛，穉麥服處，躁中煩外，羈堅轡，附易路，於是伯樂相其前後，王良造父爲之御，秦缺樓

季爲之右。此兩人者，馬佚能止之，車覆能起之。於是使射干、錡之重，爭千里之逐。此亦天下之至駿也。太子能強起乘之乎？太子曰：僕病未能也。

客曰：旣登景夷之臺，南望荆山，北望汝海，左江右湖，其樂無有。於是使博辯之士，原本山川，極命草木，比物屬事，離辭連類，浮游覽觀，乃下置酒於虞懷之宮，連廊四注，臺城層構，紛紜玄綠，輦道邪交，黃池紆曲，溷章白鷺，孔雀鸚鵡，鸕雛鵲，翠鬣紫纓，螭龍德牧，邕邕羣鳴，陽魚騰躍，奮翼振鱗，淑溲蓐蓼，蔓草芳苓，女桑河柳，素葉紫莖，苗松豫章，條上造天，梧桐并欄，極望成林，眾芳芬鬱，亂於五風，從容猗靡，消息陽陰，列坐縱酒，蕩樂娛心，景春佐酒，杜連理音，滋味雜陳，肴糝錯該，練色娛目，流聲悅耳，於是乃發激楚之結，風揚鄭衛之皓樂，使先施徵舒，陽文段干，吳娃閭媿，傅予之徒，雜

裾垂髻目窅心與揄流波雜杜若蒙清塵被蘭澤嫵服而御此亦天下之靡麗皓侈廣博之樂也太子能強起游乎太子曰僕病未能也

客曰將爲太子馴騏驥之馬駕飛輪之輿乘牡駿之乘右夏服之勁箭左烏號之彫弓游涉乎雲林周馳乎蘭澤弭節乎江潯揜青蘋游清風陶陽氣蕩春心逐狡獸集輕禽於是極犬馬之才困野獸之足窮相御之智巧恐虎豹懼鷲鳥逐馬鳴鑣魚跨麋角履游麋兔蹈踐麋鹿汗流沫墜兔伏陵窘無創而死者固足充後乘矣此校獵之至壯也太子能彊起游乎太子曰僕病未能也然陽氣見於睂宇之間侵淫而上幾滿大宅客見太子有悅色也遂推而進之曰冥火薄天兵車雷運旌旗偃蹇羽旄肅紛馳騁角逐慕味爭先徽墨廣博望之有圻純粹全犧獻之公門太子曰善願復聞

之客曰未既於是榛林深澤煙雲闇莫兕虎並作毅武孔猛袒裼
身薄白刃磴磴矛戟交錯收獲掌功賞賜金帛掩蘋肆若爲牧人
席旨酒嘉肴羞魚膾炙以御賓客涌觴並起動心驚耳誠必不悔
決絕以諾貞信之色形於金石高歌陳唱萬歲無斃此真太子之
所喜也能彊起而游乎太子曰僕甚願從直恐爲諸大夫累耳然
而有起色矣

客曰將以八月之望與諸侯遠方交遊兄弟並往觀濤乎廣陵之
曲江至則未見濤之形也徒觀水力之所到則卹然足以駭矣觀其
所駕軼者所擢拔者所揚汨者所温汾者所滌汔者雖有心略辭
給固未能縷形其所由然也况兮忽兮聊兮慄兮混汨汨兮忽兮
慌兮俶兮儻兮浩瀆瀆兮慌曠曠兮秉意乎南山通望乎東海虹
洞兮蒼天極慮乎崖涘流攬無窮歸神日母汨乘流而下降兮或

不知其所止，或紛紜其流折兮。忽繆往而不來，臨朱汜而遠逝兮。

中虛煩而益息，莫離散而發曙兮。

爾按暮離散者晚潮去也發曙者早潮來也

內存心而自持。

於是澡概胷中，灑練五藏，澹漱手足，頽濯髮齒，揄棄恬怠，輸寫滯

濁，分決狐疑，發皇耳目。當是之時，雖有淹病滯疾，猶將伸偃起蹙

發，瞽披聾而觀望之也。況直眇小煩，懣醒醲病酒之徒哉。故曰發

蒙解惑，不足以言也。太子曰善，然則濤何氣哉。客曰：不記也。然聞

於師曰：似神而非者三。疾雷聞百里，江水逆流，海水上潮，山出內

雲，日夜不止，衍溢漂疾，波涌而濤起，其始起也，淇淋淋焉。若白鷺

之下，翔其少進也。浩浩澹澹，如素車白馬，帷蓋之張，其波涌而雲

亂，擾擾焉如三軍之騰裝，其旁作而奔起也。飄飄焉如輕車之勒

兵，六駕蛟龍，附從太白，純馳浩蜺，前後絡繹，颯颯叩叩，楛楛彊彊

莘莘，將將，壁壘重堅，沓雜似軍行，訇隱匈磕，軋盤涌裔，原不可當。

觀其兩旁，則滂渤拂鬱，闔漠感突，上擊下律，有似勇壯之卒，突怒而無畏，蹈壁衝津，窮曲隨隈，踰岸出追，遇者死，當者壞，初發乎或圍之，津涯芟軫，谷分迴翔，青篋銜枚，檀桓弭節，伍子之山，通厲肯母之場，凌赤岸，躡扶桑，橫奔似雷行，誠奮厥武，如振如怒，沌沌渾渾，狀如奔馬，混混庀庀，聲如雷鼓，發怒屋杳，清升踰跼，侯波奮振，合戰於藉藉之口，鳥不及飛，魚不及迴，獸不及走，紛紛翼翼，波涌雲亂，蕩取南山，背擊北岸，覆虧巨陵，平夷西畔，險險戲戲，崩壞陂池，決勝乃罷，澗汨潺湲，披揚流灑，橫暴之極，魚鼈失勢，顛倒偃側，沈沈潏潏，蒲伏連延，神物怪疑，不可勝言，直使人踣焉洄，闔悽愴焉。此天下怪異詭觀也。太子能彊起觀之乎？太子曰：僕病未能也。客曰：將爲太子奏方術之士有資略者，若莊周、魏牟、楊朱、墨翟、便娟、詹何之倫，使之論天下之精微，理萬物之是非，孔老覽觀，孟子

持籌而算之萬不失一此亦天下要言妙道也太子豈欲聞之乎於是太子據几而起曰渙乎若一聽聖人辯士之言忽然汗出霍然病已

漢武帝秋風辭

秋風起兮白雲飛草木黃落兮雁南歸蘭有秀兮菊有芳懷佳人兮不能忘泛樓船兮濟汾河橫中流兮揚素波簫鼓鳴兮發棹歌歡樂極兮哀情多少壯幾時兮奈老何

漢武帝瓠子歌

瓠子決兮將奈何浩浩洋洋慮殫爲河殫爲河兮地不得寧功無已時兮吾山平吾山平兮鉅野溢魚弗鬱兮柏冬日正道弛兮離常流蛟龍騁兮放遠遊歸舊川兮神哉沛不封禪兮安知外皇謂河伯兮何不仁泛濫不止兮愁吾人鬻桑浮兮淮泗滿久不反兮

水維緩

河湯湯兮激潏潏，北渡回兮迅流難。舉長菱兮湛美玉，河伯許兮
薪不屬。薪不屬兮衛人罪，燒蕭條兮噫乎何。呂御水，隕林竹兮捷
石菑，宣防塞兮萬福來。

淮南小山招隱士

王逸以爲淮南小山之辭，蓋藝文志所云淮南王羣臣賦也。文選直題爲淮南王安作，備疑昭明之世，容有班固賈逵所解楚詞或據異說。○○○

題之

桂樹叢生兮山之幽，偃蹇連卷兮枝相繚。山氣曩嵒兮石嗟峨，谿
谷嶄巖兮水曾波。猿狖羣嘯兮虎豹嘯，攀援桂枝兮聊淹留。王孫
遊兮不歸，春草生兮萋萋。歲莫兮不自聊，蟋蟀鳴兮啾啾。坱兮軋，
山曲拂兮心淹留兮恫荒忽，罔兮沕兮僚兮慄。虎豹呿，叢薄深林兮人
上慄。窞窞碣礧兮碣礧，碣礧樹輪相糺兮林木芟。青莎雜樹兮
蘋草霍靡，白鹿麕麕兮或騰或倚。狀貌崑崑兮峩峩，淒淒兮漉漉。

獼猴兮熊羆慕類兮以悲攀援桂枝兮聊淹留虎豹鬪兮熊羆咆
禽獸駭兮亡其曹王孫兮歸來山中兮不可以久留

東方曼倩客難

客難東方朔曰蘇秦張儀一當萬乘之主而都卿相之位澤及後
世今子大夫修先王之術慕聖人之義諷誦詩書百家之言不可
勝記著於竹帛脣腐齒落服膺而不釋好學樂道之效明白甚矣
自以智能海內無雙則可謂博聞辯智矣然悉力盡忠以事聖帝
曠日持久官不過侍郎位不過執戟意者尙有遺行邪同胞之徒
無所容居其故何也東方先生喟然長息仰而應之曰是固非子
之所能備彼一時也此一時也豈可同哉夫蘇秦張儀之時周室
大壞諸侯不朝力政爭權相禽以兵并爲十二國未有雌雄得士
者彊失士者亡故談說行焉身處尊位珍寶充內外有廩倉澤及

後世子孫長享。今則不然。聖帝流德，天下震懼，諸侯賓服，連四海之外，以爲帶。安於覆盂，天下平均，合爲一家。動發舉事，猶運之掌。賢不肖，何以異哉？遵天之道，順地之理，物無不得其所。故綏之則安，動之則苦。尊之則爲將，卑之則爲虜。抗之則在青雲之上，抑之則在深淵之下。用之則爲虎，不用則爲鼠。雖欲盡節效情，安知前後？夫天地之大，士民之眾，竭精談說，並進輻湊者，不可勝數。悉力募之，困於衣食，或失門戶，使蘇秦、張儀與僕並生於今之世，曾不得掌故。安敢望常侍郎乎？傳曰：天下無害菑，雖有聖人，無所施才。上下和同，雖有賢者，無所立功。故曰：時異事異。雖然，安可以不務修身乎哉？詩曰：鼓鐘于宮，聲聞于外；鶴鳴于九臯，聲聞于天。苟能修身，何患不榮？太公體行仁義，七十有二，乃設用於文武，得信厥說，封於齊，七百歲而不絕。此士所以日夜孳孳，修學敏行，而不敢

怠也。辟若鷩鷩，飛且鳴矣。傳曰：天不爲人之惡，寒而輟其冬，地不

爲人之惡，險而輟其廣。君子不爲小人之匈匈而易其行。天有常

度，地有常形。君子有常行，君子道其常，小人計其功。詩云：禮義之

不愆，何恤人之言。上既云當修身矣，而東方行事乃如有遺行者，故此下復言己之修身，乃在大德而不拘小節，但求自得本心之安而已。故世尤不能識之。

故曰：水至清則無魚，人至察則無徒。冕而前旒，所以蔽明；黻纁充

耳，所以塞聰。明有所不見，聰有所不聞。舉大德，赦小過，無求備於

一人之義也。枉而直之，使自得之；優而柔之，使自求之；揆而度之，

使自索之。蓋聖人之教化如此，欲其自得之，自得之，則敏且廣矣。

何吧瞻云：本望武帝知之不盡，反言明有所遺者，君道固然。今世之處士，魁然無徒，廓然獨居，上觀許由，

下察接輿，計同范蠡，忠合子胥，天下和平，與義相扶，寡耦少徒，固

其宜也。子何疑於予哉？若夫燕之用樂毅，秦之任李斯，酈食其之

下齊，說行如流，曲從如環，所欲必得，功若丘山，海內定，國家安，是

遇其時也。子又何怪之邪？語曰：以筦闢天，以螽測海，以莛撞鐘，豈能通其條貫，考其文理，發其音聲哉？繇是觀之，譬猶鼪鼯之襲狗，孤豚之咋虎，至則靡耳，何功之有？今以下愚而非處士，雖欲勿困，固不得已。此適足以明其不知權變，而終惑於大道也。

蓋鳩先生云：理遇宏放之氣如

爾雲而
上馳

東方曼倩非有先生論。

非有先生仕於吳，進不稱往古以厲主意，退不能揚君美以顯其功。默然無言者三年矣。吳王怪而問之曰：寡人獲先人之功，寄於眾賢之上，夙興夜寐，未嘗敢怠也。今先生率然高舉，遠集吳地，將以輔治寡人，誠竊嘉之。體不安席，食不甘味，目不視靡曼之色，耳不聽鐘鼓之音，虛心定志，欲聞流議者，三年於茲矣。今先生進無以輔治，退不揚主譽，竊不為先生取之也。蓋懷能而不見，是不忠。

也見而不行。主不明也。意者寡人殆不明乎。非有先生伏而唯唯。吳王曰。可以談矣。寡人將竦意而覽焉。先生曰。於戲可乎哉。可乎哉。談何容易。夫談有悖於目。拂於耳。謬於心。而便於身者。或有說於目。順於耳。快於心。而毀於行者。非有明王聖主。孰能聽之。吳王曰。何爲其然也。中人以上。可以語上也。先生試言。寡人將聽焉。先生對曰。昔者關龍逢深諫於桀。而王子比干直言於紂。此二臣者。皆極慮盡忠。闕主澤不下流。而萬民騷動。故直言其失。切諫其邪者。將以爲君之榮。除主之禍也。今則不然。反以爲誹謗君之行。無人臣之禮。果紛然傷於身。蒙不辜之名。戮及先人。爲天下笑。故曰。談何容易。是以輔弼之臣。瓦解而邪諂之人。並進。及蜚廉惡來革等。二人皆詐僞。巧言利口。以進其身。陰奉瑯琊刻鏤之好。以納其心。務快耳目之欲。以苟容爲度。遂往不戒。身沒被戮。宗廟崩阨。國

家爲虛放戮聖賢親近讒夫詩不云乎讒人罔極交亂四國此之謂也故卑身賤體說色微辭愉愉响响終無益於主上之治則志士仁人不忍爲也將儼然作矜嚴之色深言直諫上以拂主之邪下以損百姓之害則忤於邪主之心歷於衰世之法故養壽命之士莫肯進也遂居深山之間積土爲室編蓬爲戶彈琴其中以咏先王之風亦可以樂而忘死矣是以伯夷叔齊避周餓于首陽之下後世稱其仁如是邪主之行固足畏也故曰談何容易於是吳王懼然易容捐薦去几危坐而聽先生曰接輿避世箕子被髮佯狂此二人者皆避濁世以全其身者也使遇明王聖主得清燕之閒寬和之色發憤畢誠圖畫安危揆度得失上以安主體下以便萬民則五帝三王之道可幾而見也故伊尹蒙恥辱負鼎俎和五味以干湯太公釣於渭之陽以見文王心合意同謀無不成計無

不從誠得其君也。深念遠慮，引義以正其身，推恩以廣其下。本仁祖義，褒有德，祿賢能，誅惡亂，總遠方，一統類，美風俗。此帝王所由昌也。上不變天性，下不奪人倫，則天地和洽，遠方懷之。故號聖王。臣子之職，既加矣。於是裂地定封，爵爲公侯，傳國子孫，名顯後世。民到於今稱之，以遇湯與文王也。太公伊尹以如此，龍逢比干，獨如彼，豈不哀哉！故曰：談何容易。於是吳王穆然俛而深惟，仰而泣下。交頤曰：嗟乎！余國之不亡也，縣縣連連，殆哉！世之不絕也，於是正明堂之朝，齊君臣之位，舉賢材，布德惠，施仁義，賞有功，躬節儉，減後宮之費，損車馬之用，放鄭聲，遠佞人，省庖廚，去侈靡，卑宮館，壞苑囿，填池塹，以予貧民，無產業者，開內藏，振貧窮，存耆老，卹孤獨，薄賦斂，省刑辟。行此三年，海內晏然，天下大治，陰陽和調，萬物咸得其宜，國無災害之變，民無飢寒之色，家給人足，畜積有餘，罔

圖空虛，鳳凰來集，麒麟在郊，甘露既降，朱草萌芽，遠方異俗之人，鄉風慕義，各奉其職，而來朝賀，故治亂之道，存亡之端，若此易見，而君人者，莫肯爲也，臣愚竊以爲過，故詩云：王國克生，惟周之禎，濟濟多士，文王以寧，此之謂也。

辭賦類五

古文辭類纂六十六

司馬長卿子虛賦。

楚使子虛使於齊，王悉發車騎，與使者出畋。畋罷，子虛過，好鳥有先生，亡是公存焉。坐定，烏有先生問曰：「今日畋樂乎？」子虛曰：「樂。獲多乎？」曰：「少。然則何樂？」對曰：「僕樂齊王之欲夸僕以車騎之眾，而僕對以雲夢之事也。」曰：「可得聞乎？」子虛曰：「可。」王駕車千乘，選徒萬騎，畋於海濱，列卒滿澤，罟網彌山，掩兔罝鹿，射麋脚麟，驚於鹽浦，割鮮染輪，射中獲多，矜而自功。顧謂僕曰：「楚亦有平原廣澤，遊獵之地，饒樂若此者乎？」楚王之獵，孰與寡人乎？」僕下車對曰：「臣，楚國之鄙人也。幸得宿衛，十有餘年，時從出遊，遊於後園，覽於有無，然猶未能徧覩也。又焉足以言其外澤乎？」齊王曰：「雖然，略以子之所聞見而言之。」僕對曰：「唯唯。臣聞楚有七澤，嘗見其一，未覩其餘也。臣

之所見蓋特其小小者耳名曰雲夢雲夢者方九百里其中有山焉其山則盤紆峩鬱隆崇律岑岑崑參差日月蔽虧交錯糾紛上千青雲罷池陂陁下屬江河其土則丹青赭聖雌黃白坳錫碧金銀眾色炫耀照爛龍鱗其石則赤玉玫瑰琳瑯昆吾瑊玕玃石砮砮其東則有蕙圃衡蘭菡萏芎藭菖蒲苙薜蘼蕪諸柘巴苴其南則有平原廣澤登降陔靡案衍壇曼緣以大江限以巫山其高燥則生葳薜苞荔薛莎青蘋其埤溼則生藏菴葦葭東籜彫胡蓮藕菰蘆菴閭軒于眾物居之不可勝圖其西則有涌泉清池激水推移外發芙蓉菱華內隱鉅石白沙其中則有神龜蛟鼉瑇瑁鼈龜其北則有陰林巨樹榎栲豫章桂椒木蘭檠離朱楊檣梨棗栗橘柚芬芳其上則有鸞鷟孔鸞騰遠射干其下則有白虎玄豹螭虺羆狂於是乎乃使專諸之倫手格此獸楚王乃駕馴駁之駟

乘雕王之輿，靡魚須之橈，旃曳明月之珠旗，建干將之雄戟，左烏

號之雕弓，右夏服之勁箭，陽子驂乘，織阿爲御，案節未舒，卽陵狡

獸，蹴蛩蛩，躡距虛，軼野馬，馳駒駘，乘遺風，射游騏，倏眇倩泐，雷動

焱至，星流霆擊，弓不虛發，中必決背，洞霄達掖，絕乎心繫，獲若雨

獸，揜草蔽地，於是楚王乃弭節徘徊，翱翔容與，覽乎陰林，此節其記觀

壯士之暴怒，與猛獸之恐懼，微飢受詘，殫覩眾物之變態，於是鄭

女曼姬被阿緡，揄紵綺羅，垂霧縠，襲縹緗，紆徐委曲，鬱撓

谿谷，粉粉排排，揚袖戍削，蜚穢垂髻，扶輿猗靡，翕呷琴瑟，下摩蘭

蕙，上拂羽蓋，錯翡翠之葳蕤，繆繞玉綏，眇忽忽若神仙之髣髴，

於是乃相與獠於蕙圃，此卽京之蕙圃髮姍勃率，上乎金隄，揜翡翠，射駿驪

微，矰出，繳施，弋白鵠，連鴛鴦，雙鷁下，玄鶴加，怠而後發，游於清

池，此卽西之通泉清池浮文鷁，揚旌，拽張翠帷，建羽蓋，罔瑋瑁，鈎紫貝，撻金鼓，吹

鳴籟榜人歌聲流喝水蟲駭波鴻沸涌泉起奔揚會礪石相擊礪
碾礪礪若雷霆之聲聞乎數百里之外將息獠者擊靈鼓起烽燧
車按行騎就隊纏乎淫淫般乎裔裔於是楚王乃登雲陽之臺臺在
山此節怕乎無爲憺乎自持勺藥之和具而後御之不若大王終日
其南也馳騁曾不下輿將割輪焮自以爲娛臣竊觀之齊殆不如於是齊
王無以應僕也烏有先生曰是何言之過也足下不遠千里來貺
齊國王悉發境內之士備車騎之眾與使者出畋乃欲戮力致獲
以娛左右何名爲夸哉問楚地之有無者願聞大國之風烈先生
之餘論也今足下不稱楚王之德厚而盛推雲夢以爲高奢言淫
樂而顯侈靡竊爲足下不取也必若所言固非楚國之美也無而
言之是害足下之信也彰君惡傷私義二者無一可而先生行之
必且輕於齊而累於楚矣且齊東階鉅海南有琅邪觀乎成山射

乎之采。浮渤澥。游孟諸。邪與肅慎爲鄰。右以湯谷爲界。秋田乎青丘。徬徨乎海外。吞若雲夢者八九。於其胷中。曾不薈芥。若乃俶儻瑰瑋。異方殊類。珍怪鳥獸。萬端鱗倅。充牣其中。不可勝記。禹不能名。尚不能計。然在諸侯之位。不敢言游戲之樂。苑囿之大。先生又見客。是以王辭不復。何爲無以應哉。

司馬長卿上林賦。

亡是公听然而笑曰。楚則失矣。而齊亦未爲得也。夫使諸侯納貢者。非爲財幣。所以述職也。封疆畫界者。非爲守禦。所以禁淫也。今齊列爲東藩。而外私肅慎。捐國踰限。越海而田。其於義固未可也。且二君之論。不務明君臣之義。正諸侯之禮。徒事爭游戲之樂。苑囿之大。欲以奢侈相勝。荒淫相越。此不可以揚名發譽。而適足以卑君自損也。且夫齊楚之事。又烏足道乎。君未覩夫巨麗也。獨不

聞天子之上林乎。左蒼梧，右西極。丹水更其南，紫淵徑其北。終始
霸漚，出入涇渭，酆鎬潦滃，紆餘委蛇。經營乎其內，蕩蕩乎八川分
流。相背而異態，東西南北馳驚。往來出乎椒丘之闕，行乎洲淤之
浦。經乎桂林之中，過乎泱泱之壑。汨乎混流，順阿而下。赴隘陘之
口，觸穹石，激堆埼。沸乎暴怒，洶涌澎湃。溈弗宓汨，偪側泌澗。橫流
逆折，轉騰漉洌。滂漉沆漑，穹隆雲橈。宛渾膠盭，踰波趨洑。涖涖下
瀨，批巖衝擁。奔揚滯沛，臨坻注壑。澗澗貫墜，沈沈隱隱。砰磅訇礚，
潏潏淈淈。浴渠鼎沸，馳波跳沫。汨急漂疾，悠遠長懷。寂寥無聲，肆
乎永歸。然後灑漾潢漾，安翔徐回。翫乎瀉瀉，東注太湖，衍溢陂池。
於是乎蛟龍赤螭，魚鱉鱗鱗。鰐鰐鮓鮓，禺禺魼魼。捷鱗掉尾，振鱗
奮翼。潛處乎深巖，魚鼈謹聲。萬物眾夥，明月珠子的皪。江靡蜀石，
黃磬水玉磊砢。磷磷爛爛，采色滟汗。聚積乎其中，鴻鸕鵠鴉鴛鴦。

屬玉交精旋目。煩驚庸渠。箴疵鳩盧。羣浮乎其上。沈淫泛濫。隨風澹淡。與波搖蕩。奄溥水渚。唼唼菁藻。咀嚼菱藕。於是乎崇山矗矗。龍從崔巍。深林巨木。嶄巖參差。九峻截辭。南山峩峩。巖陔甌錡。推委岷崎。振溪通谷。蹇產溝瀆。谿呀豁閭。阜陵別隴。歲魄喂鹿。丘虛堀壘。隱麟鬱壘。登降施靡。陂池獬豸。沈落淫鸞。散渙夷陸。亭皋千里。靡不被築。揜以綠蕙。被以江蘼。糝以麋蕪。雜以畱夷。布結縷。攢戾莎。揭車衡蘭。橐本射干。芷薑蕤荷。葳持若蓀。鮮支黃礫。蔣苧青蘋。布濩閎澤。延曼太原。離靡廣衍。應風披靡。吐芳揚烈。郁郁菲菲。眾香發越。舂蠶布寫。唵夔唵蕝。於是乎周覽泛觀。纒紛軋芴。芒芒恍忽。視之無端。察之無崖。日出東沼。入乎西陂。其南則隆冬生長。涌水躍波。其獸則獠旄。獠犛。沈牛麀麀。赤首園題。窮奇象犀。其北則盛夏含凍。裂地涉冰。揭河其獸則麒麟。角端。駒駮。橐駝。蜚蜚。驩驩。

駸駸驢羸於。是乎離宮別館。彌山跨谷。高廊四注。重坐曲閣。華
榱璧璫。輦道纒屬。步櫺周流。長途中宿。夷峻築堂。累臺增成。巖窾
洞房。頰杳眇而無見。仰光燎而捫天。奔星更於闈闈。宛虹拖於楯
軒。青龍蚴蟉於東箱。象輿婉憚於西清。靈囿燕於閒館。偃佺之倫
暴於南榮。醴泉涌於清室。通川過乎中庭。盤石板崖。嶽巖倚傾。嗟
峨嶻嶭。刻削崢嶸。玫瑰碧琳。珊瑚叢生。璿玉旁唐。玢幽文鱗。赤瑕
駁犖。雜雷其閒。鼂采琬琰。和氏出焉。於是乎盧橘夏熟。黃甘橙棗。
枇杷檮柿。亭柰厚朴。檇棗楊梅。櫻桃蒲陶。隱夫奠棗。荅選離支。羅
乎後宮。列乎北園。鮑丘陵下。平原揚翠葉。抗紫莖。發紅華。垂朱榮。
煌煌扈扈。照曜鉅野。沙棠櫟楮。華楓枰櫨。畱落胥邪。仁頰并閭。欂
檀木蘭。豫章女貞。長千仞。大連抱。夸條直暢。實葉葳蕤。攢立叢倚。
連卷櫪侷。崔錯發。骹抗衡閭。柯垂條。扶疏落英。幡纒紛。落箭。蔘猗。

狔從風。薊莅嶷歛。蓋象金石之聲。管籥之音。僕池芷厲。旋還乎後宮。雜襲絜輯。被山緣谷。循坂下隈。視之無端。究之無窮。於是乎玄猿素雌。蛙攫飛蠋。蛭蜩蠖。獠獠胡毅。蛇棲息乎其閒。長嘯哀鳴。翩幡互經。天矯枝格。偃蹇杪顛。踰絕梁。騰殊榛。捷垂條。掉希閒。牢落陸離。爛熳遠遷。若此者數百千處。娛遊往來。宮宿館舍。庖廚不徙。後宮不移。百官備具。於是乎背秋涉冬。天子校獵。乘鏤象。六玉蚪。拖霓旌。靡雲旗。前皮軒。後道游。孫叔奉轡。衛公駮乘。扈從橫行。出乎四校之中。鼓巖簿。縱獵者。江河爲陸。泰山爲櫓。車騎雷起。殷天動地。先後陸離。離散別追。淫淫齋齋。緣陵流澤。雲布雨施。生貔豹。搏豺狼。手熊羆。足豎羊。蒙鷓蘇。綉白虎。蘇按繪畫與服志云武冠環纓無難以青系爲纒加雙鷓尾五官左右虎黃羽林中郎將羽林左右監皆冠鷓冠虎黃將虎文綉襲色威獻織成虎文此乃所云蒙鷓蘇綉白虎也孟康注鷓尾也蘇析羽也蓋得之而善注謬甚郭景純以綉爲紵亦失之

跨壘馬。凌三嶮之危。下磧歷之坻。徑峻赴險。越壑厲水。推蜚廉。弄

獬豸格蝦蛤。鋌猛氏。緇駟裏射封豕。箭不苟害。解脰陷腦。弓不虛發。應聲而倒。於是乎乘輿弭節。徘徊翔往來。睨部曲之進退。覽將帥之變態。然後侵淫促節。儵躡遠去。流離輕禽。蹴履狡獸。轆白鹿捷狡兔。軼赤電。遺光耀。追怪物。出宇宙。彎蕃弱。滿白羽。射游臯。櫟蜚遠。擇肉而后發。先中而命處。弦矢分。藝殪仆。然后揚節而上。浮凌驚風。歷駭焱。乘虛無。與神俱。躡玄鶴。亂昆雞。道孔鸞。促鷄鷄。拂翳鳥。捎鳳皇。捷鳩鵠。揜焦明。道盡塗殫。迴車而還。招搖乎襄羊。降集乎北紘。率乎直指。晦乎反鄉。歷石闕。歷封巒。過鳩鵲。望露寒。下棠梨。息宜春。西馳宣曲。濯鵠牛首。登龍臺。掩細柳。觀士大夫之勤略。均獵者之所得。獲徒車之所。轡轅步騎之所。蹂若人。臣之所。蹈藉與其窮。極倦。飢驚。憚誓。伏不被創。刃而死者。他他藉藉。填阬。滿谷。掩平。彌澤。於是乎游戲懈怠。置酒乎顛天之臺。張樂乎膠葛。

之寓撞千石之鍾立萬石之虞建翠華之旗樹靈鼉之鼓奏陶唐
氏之舞聽葛天氏之歌千人唱萬人和山陵爲之震動川谷爲之
蕩波巴渝宋蔡淮南千遮文成顛歌族居遞奏金鼓迭起鏗鎗闐
鞞洞心駭耳荆吳鄭衛之聲韶濩武象之樂陰淫案衍之音鄘郢
繽紛激楚結風俳優侏儒狄鞮之倡所以娛耳目樂心意者麗靡
爛漫於前靡曼美色若夫青琴宓妃之徒絕殊離俗妖冶嫺都靚
粧刻飾便嬛綽約柔橈嫚嫚媚媚纖弱曳獨繭之褵緜眇閭易以
卹削便姍嬖屑與俗殊服芬芳漚鬱酷烈淑郁皓齒粲爛宜笑的
皦長眉連娟微睇緜藐色授魂與心愉於側於是酒中樂酣天子
芒然而思似若有亡曰嗟乎此大奢侈朕以覽聽餘閒無事棄日
順天道以殺伐時休息於此恐後葉靡麗遂往而不返非所以爲
繼嗣創業垂統也於是乎乃解酒罷獵而命有司曰地可墾闢悉

爲農郊以贍萌隸。墮牆填塹。使山澤之人得至焉。實陂池而勿禁。虛宮館而勿切。發倉廩以救貧窮。補不足。恤鰥寡。存孤獨。出德號。省刑罰。改制度。易服色。革正朔。與天下爲更始。於是歷吉日以齋戒。襲朝服。乘法駕。建華旗。鳴玉鸞。游乎六藝之囿。馳騫乎仁義之塗。覽觀春秋之林。射狸首。兼騶虞。弋玄鶴。舞干戚。載雲罕。揜羣雅。悲伐檀。樂樂胥。修容乎禮園。翱翔乎書圃。述易道。放怪獸。登明堂。坐清廟。次羣臣。奏得失。四海之內。靡不受獲。於斯之時。天下大說。鄉風而聽。隨流而化。崑然興道而遷義。刑錯而不用。德隆於三王。而功羨乎五帝。若此。故獵乃可喜也。若夫終日馳騁。勞神苦形。罷車馬之用。抗士卒之精。費府庫之財。而無德厚之恩。務在獨樂。不顧眾庶。忘國家之政。貪雉兔之獲。則仁者不由也。從此觀之。齊楚之事。豈不哀哉。地方不過千里。而囿居九百。是艸木不得墾辟。而

民無所食也。夫以諸侯之細，而樂萬乘之所侈，僕恐百姓被其尤也。於是二子愀然改容，超若自失。逡巡避席曰：鄙人固陋，不知忌諱。乃今日見教，謹受命矣。

古文辭類纂六十六終

辭賦類六

古文辭類卷六十七

司馬長卿哀二世賦。

登陂池之長阪兮，登入曾宮之嵯峨。臨曲江之隈州兮，望南山之參差。巖巖深山之澹澹兮，通谷豁乎捨澗。汨滅喟習以永逝兮，注平臯之廣衍。觀眾樹之塙夔兮，覽竹林之榛榛。東馳土山兮，北揭石瀨。彌節容與兮，歷弔二世。持身不謹兮，亡國失執。信讒不寤兮，宗廟滅絕。嗚呼哀哉！操行之不得兮，墳墓蕪穢而不修兮。魂無歸而不食，質邈絕而不齊兮。彌久遠而愈休，精罔闐而飛揚兮。拾九天而永逝，嗚呼哀哉。

司馬長卿大人賦。

世有大人兮，在於中州。宅彌萬里兮，曾不足以少畱。悲世俗之迫隘兮，揭輕舉而遠游。垂絳幡之素蜺兮，載雲氣而上浮。建格澤之

長竿兮總光耀之采旄垂旬始以爲慘兮。批彗星而爲髻。掉指擣以偃蹇兮。又旖旎以招搖。攬機槍以爲旌兮。靡屈虹而爲綢。紅沓泖以眩潛兮。焱風涌而雲浮。駕應龍象輿之螭。略透麗兮。驂赤螭青虯之螭。繆蜿蜒低叩天。嶠据以驕。驚兮。詘折隆窮。躩以連卷。沛艾赴蟻。乞以怡。儼兮。放散畔。驤以孱。顏踣。躡轄容以透麗兮。綢繆偃蹇。怵。奚以梁倚。糾蓼叫。冥。踣以艘。路兮。茂蒙踊躍。騰而狂。趨。莅。颯。卉。翕。燦。至。電。過。兮。煥。然。霧。除。霍。然。雲。消。耶。絕。少。陽。而。登。太。陰。兮。與。真。人。乎。相。求。互。折。窈。窕。以。右。轉。兮。橫。厲。飛。泉。以。正。東。悉。徵。靈。囿。而。選。之。兮。部。署。眾。神。於。瑤。光。使。五。帝。先。導。兮。反。太。一。而。從。陵。陽。左。玄。冥。而。右。含。靈。兮。前。陸。離。而。後。滈。滈。斯。征。伯。僑。而。役。羨。門。兮。屬。岐。伯。使。尙。方。祝。融。警。而。蹕。御。兮。清。氣。氛。而。後。行。屯。余。車。其。萬。乘。兮。粹。雲。蓋。而。樹。華。旗。使。句。芒。其。將。行。兮。吾。欲。往。乎。南。嶴。歷。唐。堯。於。

崇山兮過虞舜於九疑紛湛湛其差錯兮雜遝膠葛以方馳騷擾
衝從其相紛挐兮滂瀉決軋灑以林離鑽羅列聚叢以龍茸兮衍
曼流爛壇以陸離徑入雷室之砰磷鬱律兮洞出鬼谷之崑崙鬼
壤徧覽八紘而觀四荒兮竭度九江而越五河經營炎火而浮弱
水兮杭絕浮渚而涉流沙奄息總極汜濫水嬉兮使靈媧鼓瑟而
舞馮夷時若夔夔將混濁兮召屏翳誅風伯而刑雨師西望崑崙
之軋物洗忽兮直徑馳乎三危排閭闔而入帝宮兮載玉女而與
之歸舒闔風而搖集兮亢烏騰而一止低回陰山翔以紆曲兮吾
乃今日睹西王母矐然白首戴勝而穴處兮亦幸有三足烏爲之
使必長生若此而不死兮雖濟萬世不足以喜回車竭來兮絕道
不周會食幽都呼吸沆瀣兮餐朝霞嘍咀芝英兮噉瓊華媵侵溘
而高縱兮紛鴻涌而上厲貫列缺之倒景兮涉豐隆之滂沛馳游

道而修降兮。驚遺霧而遠逝。迫區中之隘陝兮。舒節出乎北垠。遺屯騎於玄闕兮。軼先驅於寒門。下崢嶸而無地兮。上寥廓而無天。視眩眠而無見兮。聽恫恍而無聞。乘虛無而上假兮。超無友而獨存。解按此賦多取於遠遊。遠遊先訪求中國仙人之居。乃至天帝之宮。又下周覽天地之間。自於微闕以下。分東西南北四段。此賦自橫厲飛泉以正東以下。分東南西北四段。而求仙人之居。意即載其間。末六句與遠遊語同。然屈子意在遠去世之沉濁。故云至清。而與太初爲鄰。長卿則謂帝若果能爲仙人。卽居此無聞無見無友之地。亦胡樂乎此。邪與屈子語同而意別矣。

司馬長卿長門賦

有序。

孝武皇帝陳皇后。時得幸。頗妒。別在長門宮。愁悶悲思。聞蜀郡成都司馬相如。天下工爲文。奉黃金百斤。爲相如文君取酒。因于解悲愁之辭。而相如爲文以悟主上。陳皇后復得親幸。其辭曰。

夫何一佳人兮。步逍遙以自虞。魂踰佚而不返兮。形枯槁而獨居。言我朝往而暮來兮。飲食樂而忘人。心慊移而不省故兮。交得意而相親。伊予志之慢愚兮。懷貞慙之歡心。願賜問而自進兮。得尙

君之玉音奉虛言而望誠兮。期城南之離宮修薄具而自設兮。君
曾不肯乎幸臨廓獨潛而專精兮。天飄飄而疾風登蘭臺而遙望
兮。神怳怳而外淫浮雲鬱而四塞兮。天窈窈而晝陰雷殷殷而響
起兮。聲象君之車音飄風迴而赴閨兮。舉帷幄之檐檐桂樹交而
相紛紛兮。芳酷烈之閭闔孔雀集而相存兮。玄猿嘯而長吟翡翠習
翼而來萃兮。鸞鳳飛而北南心憑噫而不舒兮。邪氣壯而攻中下
蘭臺而周覽兮。步從容於深宮正殿塊以造天兮。鬱竝起而穹崇
閒徙倚於東廂兮。觀夫靡靡而無窮擠玉戶以撼金鋪兮。聲噌吰
而似鐘音刻木蘭以爲榱兮。飾文杏以爲梁羅丰茸之游樹兮。離
樓梧而相攢施瑰木之構榼兮。委參差以棟梁時髣髴以物類兮。
象積石之將將五色炫以相曜兮。爛耀耀而成光綴錯石之瓊甃
兮。象瑋瑁之文章張羅綺之幔帷兮。垂楚組之連綱撫柱檜以從

容兮覽曲臺之央央白鶴噉以哀號兮孤雌踣於枯楊日黃昏而
望絕兮悵獨託於空堂懸明月以自照兮徂清夜於洞房援雅琴
以變調兮奏愁思之不可長按流徵以卻轉兮聲幼妙而復揚貫
歷覽其中操兮意慷慨而自叩左右悲而垂淚兮涕流離而縱橫
舒息悒而增欷兮蹠履起而彷徨揄長袂以自翳兮數昔日之譽
殃無面目之可顯兮遂頽思而就牀搏芬若以爲枕兮席荃蘭而
蒞香忽寢寐而夢想兮魄若君之在旁惕寤覺而無見兮魂廷廷
若有亡眾雞鳴而愁子兮起視月之精光觀眾星之行列兮畢昂
出於東方望中庭之藹藹兮若季秋之降霜夜曼曼其若歲兮懷
鬱鬱其不可再更澹偃蹇而待曙兮荒亭亭而復明妾人竊自悲
兮究年歲而不敢忘

司馬長卿難蜀父老。

漢興七十有八載，德茂存乎六世，威武紛紜，湛恩汪濊，羣生霑濡，洋溢乎方外。於是乃命使西征，隨流而攘，風之所被，罔不披靡。因朝冉從驪，定竿存邛，略斯榆，舉苞蒲，結軌還轅，東鄉將報。至於蜀都，耆老大夫薦紳先生之徒二十有七人，儼然造焉。辭畢，因進曰：蓋聞天子之於夷狄也，其義羈縻，勿絕而已。今罷三郡之士，通夜郎之塗，三年於茲，而功不竟，士卒勞倦，萬民不贍。今又接以西夷百姓力屈，恐不能卒業。此亦使者之累也。竊爲左右患之。且夫邛笮西夔之與中國竝也，歷年茲多，不可記已。仁者不以德來，彊者不以力并。意者其殆不可乎？今割齊民以附夷狄，弊所恃以事無用，鄙人固陋，不識所謂。使者曰：烏謂此邪？必若所云，則是蜀不變服，而巴不化俗也。余尙惡聞若說。然斯事體大，固非觀者之所覩也。余之行急，其詳不可得聞。已請爲大夫龕陳其略。蓋世必有非

常之人。然後有非常之事。有非常之事。然後有非常之功。夫非常者。固常人之所異也。故曰。非常之原。黎民懼焉。及臻厥成。天下晏如也。昔者鴻水浮出。汜濫溢溢。民人登降。移徙崎嶇。而不安。夏后氏賊之。乃堙鴻水。決江疏河。漉沈贍菑。東歸之於海。而天下永寧。當斯之勤。豈惟民哉。心煩於慮。而身親其勞。躬腴胝無皮膚不生毛。故休烈顯乎無窮。聲稱浹乎于茲。且夫賢君之踐位也。豈特委瑣握躡。拘文牽俗。循誦習傳。當世取說云爾哉。必將崇論閎議。創業垂統。爲萬世規。故馳驚乎兼容。并包而勤思乎參天貳地。且詩不云乎。普天之下。莫非王土。率土之濱。莫非王臣。是以六合之內。八方之外。浸濶衍溢。懷生之物。有不浸潤於澤者。賢君恥之。今封疆之內。冠帶之倫。咸獲嘉祉。靡有闕遺矣。而夷狄殊俗之國。遼絕異黨之地。舟輿不通。人迹罕至。政教未加。流風猶微。內之則犯義。

僂禮於邊境外之則邪行橫作放弑其上君臣易位尊卑失序父
兄不辜幼孤爲奴虜係累號泣內嚮而怨曰蓋聞中國有至仁焉
德洋而恩普物靡不得其所今獨曷爲遺已舉踵思慕若枯旱之
望雨。盤夫爲之垂涕。況乎上聖又惡能已。故北出師以討彊胡。南
馳使以誚勁越。四面風德。二方之君。鱗集仰流。願得受號者以億
計。故乃關沫若。徼牂柯。鏤靈山。梁孫原。創道德之塗。垂仁義之統。
將博恩廣施。遠撫長駕。使疏逖不閉。習爽闇昧。得耀乎光明。以偃
甲兵於此。而息誅伐於彼。遐邇一體。中外禔福。不亦康乎。夫拯民
於沈溺。奉至尊之休德。反衰世之陵遲。繼周氏之絕業。斯乃天子
之急務也。百姓雖勞。又惡可以已哉。且夫王事固未有不始於憂
勤。而終於佚樂者也。然則受命之符。合在於此矣。方將增泰山之
封。加梁父之事。鳴和鸞。揚樂頌。上咸五。下登三。觀者未覩。指聽者

未聞音。猶鷦明已翔乎廖廓。而羅者猶視乎藪澤。悲夫。於是諸大夫芒然喪其所懷來。而失厥所以進。喟然竝稱曰。允哉漢德。此鄙人之所願聞也。百姓雖勞。請以身先之。敝罔靡徒。因遷延而辭避。司馬長卿封禪文。

伊上古之初肇。自昊穹生民。歷選列辟。以迄乎秦。率邇者踵武。逖聽者風聲。紛綸威蕤。堙滅而不稱者。不可勝數。繼韶夏。崇號謚。略可道者。七十有二君。罔若淑而不昌。疇逆失而能存。軒轅之前。遐哉邈乎。其詳不可得聞已。五三六經載籍之傳。惟見可觀也。書曰。元首明哉。股肱良哉。因斯以談。君莫盛於唐堯。臣莫賢於后稷。后稷創業於唐。公劉發迹於西戎。文王改制。爰周邽隆。大行越成。但安終哉。然無異端。慎所由於前。謹遺教於後耳。故軌迹夷易。易遵也。

先生云成卽

下云溫梁父登泰山卽管子所云成王封泰山禪社首

湛恩龐洪，易豐也。憲度著明，易則也。垂統理順，易繼也。是以業隆

於襁褓，而崇冠乎二后。揆厥所元，終都攸卒。未有殊尤絕迹，可考

於今者也。

補按此處文則狹小成主而夸漢實則謂古聖謹慎之道易遵易繼今舍之而更爲浩侈則難以繼繼古聖所未爲而今欲過之可乎

然猶躡梁

父登太山，建顯號，施尊名。大漢之德，逢涌原泉，沕滴曼羨，旁魄四

塞。雲布霧散，上暢九垓，下泝八埏。懷生之類，沾濡漫潤，協氣橫流。

武節焱逝，爾陜游原，迴闊泳末。首惡鬱沒，闇昧昭晰。昆蟲闔澤，回

首面內。然後囿騶虞之珍羣，徼麋鹿之怪獸。導一莖六穗於庖犧。

雙貉共抵之獸，獲周餘放龜于岐。招翠黃乘龍於沼，鬼神接靈圉。

賓於閭館，奇物譎詭。俶儻窮變，欽哉符瑞。臻茲猶以爲德薄，不敢

道封禪。蓋周躍魚隕杭，休之以燎。微夫斯之爲符也，以登介丘。不

亦惡乎。進攘之道，何其爽與。於是大司馬進曰：陛下仁育羣生，義

征不諱。諸夏樂貢，百蠻執贄。德牟往初，功無與二。休烈浹洽，符瑞

眾變期應紹至，不特創見。意者太山梁父，設壇場望幸。蓋

伯父靈馬先生云師古曰

蓋發語辭子謂當如考工記輸人爲蓋之蓋

號以況榮。上帝垂恩儲祉，將以薦成。陛下謙讓而

弗發也，挈三神之歡，缺王道之儀。羣臣惡焉，或謂且天爲質。

伯父靈馬先生

云周頌匪且有且毛傳云且此也

閻示珍符，固不可辭。若然辭之，是泰山靡記而梁父

罔幾也。亦各竝時而榮，咸濟厥世而屈。說者尙何稱於後，而云七十二君哉。夫修德以錫符，奉符以行事，不爲進越也。故聖王弗替而修禮地祇，謁款天神，勒功中岳，以章至尊。舒盛德，發號榮，受厚福，以浸黎民。皇皇哉斯事，天下之壯觀，王者之不業，不可貶也。願陛下全之。而后因雜縉紳先生之略術，使獲曜日月之末光，絕炎以展采，錯事猶兼正列其義，被節厥文。作春秋一藝，將襲舊六爲七，攄之無窮。俾萬世得激清流，揚微波，蜚英聲，騰茂實。前聖之所以永保鴻名，而常爲稱首者，用此宜命掌故，悉奏其儀，而覽焉。於

是天子沛然改容曰。俞乎。朕其試哉。乃遷思回慮。總公卿之議。詢封禪之事。詩大澤之博。廣符瑞之富。遂作頌曰。自我天覆。雲之油油。甘露時雨。厥壤可游。滋液滲漉。何生不育。嘉穀六穗。我穡曷蓄。匪唯雨之。又潤澤之。匪唯濡之。汜布護之。萬物熙熙。懷而慕思。名山顯位。望君之來。君乎君乎。侯不邁哉。殷殷之獸。樂我君囿。白質黑章。其儀可嘉。旻旻穆穆。君子之態。蓋聞其聲。今視其來。厥塗靡從。天瑞之徵。茲爾於舜。虞氏以興。濯濯之麟。遊彼靈時。孟冬十月。君徂郊祀。馳我君輿。帝用享祉。三代之前。蓋未嘗有。宛宛黃龍。興德而升。采色炫耀。煥炳輝煌。正陽顯見。覺寤黎烝。於傳載之。云受命所乘。厥之有章。不必諄諄。依類託寓。諭以封巒。披藝觀之。天人之際。已交。上下之情。允洽。聖王之德。兢兢翼翼。故曰。於興必慮衰。安必思危。是以湯武至尊嚴。不失肅祇。舜在假典。顧省厥遺。此之

謂也

伯父薑塢先生云封禪文相如創爲之體兼賦頌其設意措辭皆翔蹶虛無非如揚班之徒

之作用後如相
如文句欲活

古文辭類纂六十七

知其始以學思同融融公融之始

辭賦類七

古文辭類纂六十八

揚子雲甘泉賦○○○

孝成帝時客有薦雄文似相如者上方郊祠甘泉泰畤汾陰后土
旨求繼嗣召雄待詔承明之庭正月從上甘泉還奏甘泉賦旨風
其辭曰

惟漢十世將郊上玄定泰時雍神休尊明號同符三皇錄功五帝
卹亂錫羨拓迹開統於是乃命羣僚歷吉日協靈辰星陳而天行
詔招搖與太陰兮伏鉤陳使當兵屬堪輿以壁壘兮梢夔魑而扶
猶狂八神奔而警蹕兮振殷轡而軍裝蚩尤之倫帶干將而秉玉
戚兮飛蒙茸而走陸梁齊總總以搏搏其相膠轕兮姦駭雲迅奮
以方攘駢羅列布鱗以雜沓兮傑倮參差魚頡而鳥跖翕赫矚霍
霧集而蒙合兮半散照爛粲以成章於是乘輿乃登夫鳳皇兮而

翳華芝。駟蒼螭兮。六素虯。螭略蕤綬。灑序穆纒。帥爾陰閉。雪然陽
開。騰清霄而軼浮景兮。夫何旃旒郅偁之旖旎也。流星旄以電爍
兮。咸翠蓋而鸞旗屯萬騎於中營兮。方玉車之千乘。聲駢隱以陸
離兮。輕先疾雷而馭遺風。凌高衍之崿嶢兮。超紆譎之清澄。登椽
藥而飏天門兮。馳閶闔而入凌兢。是時未轅夫甘泉也。迺望通天
之繹繹。下陰潛以慘慄兮。上洪紛而相錯。直嶢嶢以造天兮。厥高
慶而不可乎彌度。平原唐其壇曼兮。列新雉於林薄。攢并閭與芟
莠兮。紛被麗其亡鄂。崇巨陵之駸駸兮。深溝嶽巖而爲谷。逞逞離
宮般以相爍兮。封巒石關。迤靡乎延屬。於是大厦雲譎。波詭摧。唯
而成觀。仰橋首以高視兮。目冥眴而亡見。正瀏濫以弘恂兮。指東
西之漫漫。徒徊徊以徨徨兮。魂固眇眇而昏亂。據軫軒而周流兮。
忽塊圯而亡垠。翠玉樹之青蔥兮。璧馬犀之隣璊。金人伉伉其承

鐘虞兮嵌巖巖其龍鱗揚光曜之燎爚兮垂景炎之忻忻配帝居
之懸圃兮象泰壹之威神洪臺岬其獨出兮檄北極之嶸嶸列宿
迺施於上榮兮日月纒經於杳樞雷鬱律於巖罅兮電倏忽於牆
藩鬼魅不能自逮兮半長途而下顛歷倒景而絕飛梁兮浮蟻蠓
而撇天左欂櫨而右玄冥兮前燁闕而後應門蔭西海與幽都兮
涌醴汨以生川蛟龍連蜷於東厓兮白虎敦圜乎崑崙覽穆流於
高光兮溶方皇於西清前殿崔巍兮和氏瓏玲抗浮柱之飛榱兮
神莫莫而扶傾閎閎其寥廓兮似紫宮之崢嶸駢交錯而曼衍
兮峻嶂隗乎其相嬰乘雲閣而上下兮紛蒙籠以棍成曳紅采之
流離兮颺翠氣之宛延襲璇室與傾宮兮若登高眇遠亡國亡國字漢書無是
肅乎臨淵迴焱肆其碣駭兮玃桂椒而鬱移楊香芬菲以穹隆兮
擊薄櫨而將榮薌咲臍以棍批兮聲駢隱而歷鍾排玉戶而颺金

鋪兮發蘭蕙與芎藭帷弮張其拂汨兮稍暗暗而靚深陰陽清濁
穆羽相和兮若夔身之調琴般倕棄其剗斲兮王爾投其鈎繩雖
方征僑與偃佺兮猶仿佛其若夢於是事變物化目駭耳回蓋天
子穆然珍臺閒館璇題玉英蠅蝓蠖濩之中惟夫所以澄心清魂
儲精垂恩感動天地逆釐三神者迺搜逖索偶臯伊之徒冠倫魁
能函甘棠之惠挾東征之意相與齊乎陽靈之宮靡薛荔而爲席
兮折瓊枝以爲芳喻清雲之流瑕兮飲若木之露英集乎禮神之
圃登乎頌祇之堂建光耀之長旂兮昭華覆之威威攀璇璣而下
視兮行遊目乎三危陳眾車於東阬兮肆玉軼而下馳漂龍淵而
還九垓兮窺地底而上迴風從從而扶轄兮鸞鳳紛其銜蕤梁弱
水之淵澹兮躡不周之透蛇想西王母欣然而上壽兮屏玉女而
卻宓妃玉女亡所眺其清矚兮宓妃曾不得施其蛾眉方攬道德

之精剛兮，侔神明與之爲資。於是欽柴宗祈，燎薰皇天。招搖泰壹，舉洪頤樹靈旗。樵蒸昆上，配黎四施。東爚滄海，西燿流沙。北熿幽都，南煬丹雘。玄瓊觶膠，秬鬯泔淡。肝鬯豐融，懿懿芬芬。炎感黃龍兮，燁訛碩麟。選巫咸兮，叫帝閭。開天庭兮，延羣神。儻暗藹兮，降清壇。瑞穰穰兮，委如山。於是事畢功弘，迴車而歸。度三巒兮，偈棠梨天。闔決兮，地垠開。八荒協兮，萬國諧。登長平兮，雷鼓磔。天聲起兮，勇士厲。雲飛揚兮，雨滂沛。于胥德兮，麗萬世。亂曰：崇崇圜丘，隆隱天兮。登降刻施，單捲垣兮。增宮參差，駢嵯峨兮。嶺嶢嶢兮，洞無厓兮。上天之緯，杳旭卉兮。聖皇穆穆，信厥對兮。徠祇郊禋，神所依兮。徘徊招搖，靈迟迟兮。輝光眩燿，降厥福兮。子子孫孫，長無極兮。

揚子雲河東賦。

其三月，將祭后土。上迺帥羣臣，橫大河，溱汾陰。旣祭，行遊介山，回

安邑顧龍門覽鹽池登歷觀陟西岳以望八荒迹殷周之虛眇然
目思唐虞之風雄目爲臨川羨魚不如歸而結罔還上河東賦目
勸其辭曰

伊年暮春將瘞后土禮靈祇謁汾陰於東郊因茲目勒崇垂鴻發
祥隕祉欽若神明者盛哉鑠乎越不可載已於是命羣臣齊法服
整靈輿迺撫翠鳳之駕六先景之乘掉奔星之流旗覆天狼之威
弧張耀日之玄旄揚左纛被雲梢奮電鞭駮雷輜鳴洪鍾建五旗
羲和司日顏倫奉輿風發颺拂神騰鬼越千乘霆亂萬騎屈橋嘻
嘻旭旭天地稠敷簸巨跳巒涌涓躍涇秦神下讐跣魂負沴河靈
嬰踢爪華蹈襄顏監云爪古掌字鮪按說文爪亦凡也從反爪諸兩切孔持也故蘇林注此賦云掌據之是卽持孔之義不得謂卽掌字也水經河水下鄆注引掌華蹈
襄蓋以音近而相承失讀久矣襄漢書作襄然郊祀志及史記封禪書並作襄山此文與嬰踢協韻故知作襄爲正襄字誤也遂臻陰宮穆穆肅肅蹲
蹲如也靈祇旣鄉五位時敘網緼玄黃將紹厥後於是靈輿安步

周流容與以覽序介山嗟文公而愍推兮勤大禹於龍門灑沈蒿
於豁瀆兮播九河於東瀕登歷觀而遙望兮聊浮游以經營樂往
昔之遺風兮喜虞氏之所耕瞰帝唐之嵩高兮脈隆周之大寧汨
低回而不能去兮行睨陔下與彭城滅南巢之坎坷兮易幽岐之
夷平乘翠龍而超河兮陟西岳之嶢嶠雲霧霽而來迎兮澤滲灘
而下降鬱蕭條其幽藹兮滃汎沛以豐隆叱風伯於南北兮呵雨
師於西東參天地而獨立兮廓盪盪其亡雙遵逝序歸來目函夏
之大漢兮彼曾何足與比功建乾坤之貞兆兮將悉總之目羣龍
麗鉤芒與驂蓐收兮服玄冥及祝融敦眾神使式道兮奮六經以
攄頌險於穆之緝熙兮過清廟之雝雝軼五帝之遐迹兮躡三皇
之高蹤既發軔於平盈兮誰謂路遠而不能從

上林之末有遊乎六藝之圃
及翺翔書圃之語此文法之

借行遊爲喻言以天道爲車馬以六經爲容
行乎帝王之途何必巡歷山川以爲觀覽乎

揚子雲羽獵賦

羽獵漢書注家不甚詳惟晉語御虎被羽先升韋昭注云羽鳥羽繫於背若今軍將負毳矣爾疑負毳蓋漢以後制恐古人無此韋說非也大司馬職鄭注號名者檄識所以相別在軍象其制爲之被之以備死事東京賦辭綜注揮爲肩上絳幟如燕尾者也以在肩上故曰負韓詩外傳子路曰白羽如月赤羽如朱然則羽者徽幟耳以其似羽非。○。真鳥羽也賦內羽騎營營明分殊事則其取相別識之義明矣。

其十二月羽獵雄從以爲昔在二帝三王宮館臺榭沼池苑囿林麓藪澤財足以奉郊廟御賓客充庖廚而已不奪百姓膏腴穀土桑柘之地女有餘布男有餘粟國家殷富上下交足故甘露零其庭醴泉流其唐鳳凰巢其樹黃龍游其沼麒麟臻其囿神爵棲其林昔者禹任益虞而上下和草木茂成湯好田而天下用足文王囿百里民以爲尙小齊宣王囿四十里民以爲大裕民之與奪民也武帝廣開上林東南至宜春鼎湖御宿昆吾旁南山西至長楊五柞北繞黃山濱渭而東周袤數百里穿昆明池象滇河營建章鳳闕神明馭娑漸臺泰液象海水周流方丈瀛洲蓬萊遊觀侈靡

窮妙極麗，雖頗割其三垂以贍齊民，然至羽獵甲車戎馬器械儲
侍禁禦所營，尙泰奢麗誇詡，非堯舜成湯文王三驅之意也。又恐
後世復修前好，不折中以泉臺，故聊因校獵賦以風之。其辭曰：
或稱羲農，豈或帝王之彌文哉。論者云否，各亦並時而得宜，奚必
同條而共貫，則泰山之封焉得七十而有二儀，是以創業垂統者
俱不見其爽，遐邇五三孰知其是非。遂作頌曰：麗哉神聖，處於玄
宮，富旣與地乎侔，貴正與天乎比崇。齊桓曾不足使扶轂，楚嚴
未足以爲參乘。狹三王之阨僻，嶠高舉而大興。歷五帝之寥廓，陟
三皇之登閔，建道德以爲師，友仁義與之爲朋。於是玄冬季月，天
地隆烈，萬物權興於內，徂落於外。帝將惟田于靈之囿，開北垠受
不周之制，以終始顓頊玄冥之統。迺詔虞人典澤，東延昆鄰，西馳
閭闔，儲積其侍，戍卒夾道，斬叢棘，夷野草，禦自汧渭，經營鄠鎬，章

皇周流出入日月天與地杳爾迺虎落三巘以爲司馬圍經百里而爲殿門外則正南極海邪界虞淵鴻濛沈茫碣以崇山營合圍會然後先置乎白楊之南昆明靈沼之東賁育之倫蒙盾負羽杖鏃邪而羅者以萬計其餘荷垂天之畢張竟埜之罟靡日月之朱竿曳彗星之飛旗青雲爲紛虹蜺爲纒屬之乎昆侖之墟渙若天星之羅浩如濤水之波淫淫與與前後要遮橈槍爲闔明月爲候熒惑司命天弧發射鮮扁陸離駢衍佻路徽車輕武鴻綢緹獵殷殷軫軫被陵緣坂窮望極遠者相與迺序高原之上羽騎營營分殊事繽紛往來輻轡不絕若光若滅者布乎青林之下於是天子乃以陽鼉始出乎玄宮撞鴻鍾建九旒六白虎載靈輿蚩尤並轂蒙公先驅立歷天之旂曳捎星之旃霹靂列缺吐火施鞭萃從沈溶淋離廓落戲八鎮而開關

前按將獵時先已合關天子至乃復開關入之然後縱獵

飛廉雲師吸鼻

瀟率鱗羅布列攢以龍翰秋秋踰踰入西園切神光望平樂徑竹
林蹂蕙圃踐蘭唐舉烽烈火轡者施技方馳千駟狡騎萬帥虓虎
之陳從橫膠轕竅拉雷厲驥駉駘盭洶洶旭旭天動地吸羨漫半
散蕭條數千里外若夫壯士忼慨殊鄉別趣東西南北騁耆奔欲
拖蒼豨跋犀犛蹶浮巖斫巨獫搏玄狻騰空虛距連卷踔天嶠娛
澗閒莫莫紛紛山谷爲之風森林叢爲之生塵及至獲夷之徒蹶
松柏掌蕤藜獵蒙龍麟輕飛履般首帶修蛇鉤赤豹握象犀跼密
阮超唐陂車騎雲會登降閭藹泰華爲旒熊耳爲綴木仆山還漫
若天外儲與乎大浦聊浪乎宇內於是天清日晏逢蒙列昔蓋鳩先
生云易
即其義列羿氏控弦皇車幽輶光純天地望舒彌轡翼乎徐至於上蘭
移圍徙陣浸淫楚部曲隊堅重各按行伍壁壘天旋神扶電擊逢
之則碎近之則破鳥不及飛獸不得過軍驚師駭刮野掃地及至

罕車飛揚武騎聿皇蹈飛豹羈鳴陽追天寶出一方應駢聲擊流
光野盡山窮囊括其雌雄沈沈溶溶遙喙乎紘中三軍茫然窮尤
闕與亶觀夫剽禽之繼隄犀兕之抵觸熊羆之挈攫虎豹之凌遽
徒角槍題注蹶竦訾怖魂亡魄失觸輻關脰妄發期中進退履獲
創淫輪夷丘累陵聚於是禽殫中衰相與集於靖冥之館以臨珍
池灌以岐梁溢以江河東瞰目盡西暢亡厓隨珠和氏焯爍其陂
玉石簪崙眩耀青熒漢女水潛怪物暗冥不可殫形玄鸞孔雀翽
翠垂榮王睢關關鴻雁嚶嚶羣娛乎其中嘒嘒昆鳴鳧鷖振鷺上
下砢磔聲若雷霆乃使文身之技水格鱗蟲凌堅冰犯嚴淵探巖
排碕薄索蛟螭蹈獷獮據鼃鼉扶靈螭入洞穴出蒼梧乘鉅鱗騎
京魚浮彭蠡目有虞方椎夜光之流離剖明月之珠胎鞭洛水之
宓妃餉屈原與彭胥於茲乎鴻生鉅儒俄軒冕雜衣裳修唐典匡

雅頌揖讓於前，昭光振耀，蠻貊如神，仁聲惠於北狄，武誼動於南鄰。是以旃裘之王，胡貉之長，移珍來享，抗手稱臣。前入圍口，後陳廬山。羣公常伯，楊朱墨翟之徒，喟然竝稱曰：崇哉乎德！雖有唐虞大夏，成周之隆，何以侈茲！太古之覲東嶽，禪梁基，舍此世也。其誰與哉！上猶謙讓而未俞也。方將上獵三靈之流，下決醴泉之滋，發黃龍之穴，窺鳳凰之巢，臨麒麟之囿，幸神爵之林，奮雲夢，侈孟諸，非章華，是靈臺，罕徂離宮，而輟觀遊，土事不飾，木功不彫，丞民乎農桑，勸之以弗怠，儕男女使莫違，恐貧窮者不徧被，洋溢之饒，開禁苑，散公儲，創道德之囿，弘仁惠之虞，馳弋乎神明之囿，覽觀乎羣臣之有亡，放雉兔，收豷罟，麋鹿芻蕘，與百姓共之，蓋所以臻茲也。於是醇洪邕之德，豐茂世之規，加勞三皇，勛勤五帝，不亦至乎。乃祇莊雍穆之徒，立君臣之節，崇賢聖之業，未遑苑囿之麗，遊獵

之靡也。因回軫還衡，背阿房，反未央。

揚子雲長楊賦

有序

明年上將大誇胡人以多禽獸。秋命右扶風發民入南山，西自褒斜，東至弘農，南歐漢中，張羅網罟，捕熊羆、豪豬、虎豹、狢、獾、狐、兔、麋、鹿，載以檻車，輸長楊射熊館。以網爲周法，縱禽獸其中，令胡人手搏之，自取其獲。上親臨觀焉。是時農民不得收斂，雄從至射熊館，還上長楊賦。聊因筆墨之成文章，故藉翰林以爲主人。子墨爲客卿，以風其辭曰：

子墨客卿問於翰林主人曰：蓋聞聖主之養民也，仁霑而恩洽，動不爲身。今年獵長楊，先命右扶風，左太華而右褒斜，椽蔽薛而爲弋，紆南山以爲罟，羅千乘於林莽，列萬騎於山隅。帥軍蹕陸，錫戎獲，胡搃熊羆，拖豪豬，木擁槍纍，以爲儲胥。此天下之窮覽極觀也。

雖然亦頗擾于農人三旬有餘其屢至矣而功不圖恐不識者外
之則以爲娛樂之游內之則不以爲乾豆之事豈爲民乎哉且人
君以玄默爲神澹泊爲德今樂遠出以露威靈數搖動以罷車甲
本非人主之急務也蒙竊惑焉翰林主人曰吁客何謂茲邪若客
所謂知其一未睹其二見其外不識其內也僕嘗倦談不能一二
其詳請略舉其凡而客自覽其切焉客曰唯唯主人曰昔有彊秦
封豕其土竄竄其民鑿齒之徒相與磨牙而爭之豪俊糜沸雲擾
羣黎爲之不康於是上帝眷顧高祖高祖奉命順斗極運天關橫
鉅海漂崑崙提劍而叱之所過磨城擗邑下將降旗一日之戰不
可殫記當此之勤頭蓬不暇疏飢不及餐鞮盞生蟣蝨介冑被霑
汗以爲萬姓請命乎皇天迺展民之所誦振民之所乏規億載恢
帝業七年之間而天下密如也逮至聖文隨風乘流方垂意於至

靈躬服節儉。綈衣不敝。革鞜不穿。大厦不居。木器無文。於是後宮
賤瑋瑁而疏珠璣。卻翡翠之飾。除雕琢之巧。惡麗靡而不近。斥芬
芳而不御。抑止絲竹晏衍之樂。憎聞鄭衛幼眇之聲。是以玉衡正
而太階平也。其後熏鬻作虐。東夷橫畔。羌戎睚眦。閩越相亂。遐氓
爲之不安。中國蒙被其難。於是聖武勃怒。爰整其旅。迺命驃衛。汾
沔沸渭。雲合電發。焱騰波流。機駭蠶軼。疾如奔星。擊如震霆。碎輶
輻。破穹廬。腦沙幕。髓余吾。遂躐乎王庭。驅橐駝。燒爛蠡。分勢單于。
磔裂屬國。夷阬谷。拔鹵莽。刊山石。蹂屍輿。厮係累。老弱吮鋌。癡耆
金鏃。淫夷者數十萬人。皆稽顙樹頌。扶服蛾伏。二十餘年矣。尙不
敢惕息。夫天兵四臨。幽都先加。迴戈邪指。南越相夷。靡節西征。羌
僣東馳。是以遐方。疏俗殊鄰。絕黨之域。自上仁所不化。茂德所不
綏。莫不躋足抗手。請獻厥珍。使海內澹然。永亡邊城之災。金革之

慮。今朝廷純仁，遵道顯義，并包書林，聖風雲靡，英華沈浮，洋溢八
區，普天所覆，莫不沾濡。士有不談王道者，則樵夫笑之。意者以爲
事罔隆而不殺，物靡盛而不虧，故平不肆險，安不忘危。迺時以有
年出兵，整輿竦戎，振師五柞，習馬長楊，簡力狡獸，校武票禽。迺萃
然登南山，瞰烏弋，西厭月窟，東震日域。又恐後代迷於一時之事，
常以此爲國家之大務。淫荒田獵，陵夷而不禦也。是以車不安軌，
日未靡旃。從者彷彿，散屬而還。亦所以奉太尊之烈，遵文武之度。
復三王之田，反五帝之虞，使農不輟耰，工不下機，婚姻以時，男女
莫違。出愷悌，行簡易，矜劬勞，休力役。見百年存孤弱，帥與之同苦
樂。然後陳鐘鼓之樂，鳴鞀磬之和，建碣磬之虞，拈隔鳴球，掉八列
之舞，酌允鑠，肴樂胥，聽廟中之雍雍，受神人之福祐。歌投頌，吹合
雅，其勤若此，故真神之所勞也。方將俟元符，以禪梁甫之基，增泰

山之高延光于將來。比榮乎往號。豈徒欲淫覽浮觀。馳騁杭稻之地。周流梨粟之林。蹂踐芻蕘。誇詡眾庶。盛狄獮之收。多麋鹿之獲。哉。且盲者不見咫尺。而離婁燭千里之隅。客徒愛胡人之獲。我禽獸。曾不知我亦已獲其王侯。言未卒。墨客降席再拜稽首曰。大哉體乎。允非小人之所能及也。迺今日發矇。廓然已昭矣。

此篇倣難蜀父老

揚子雲解嘲

客嘲揚子曰。吾聞上世之士。人綱人紀。不生則已。生則上尊人君。下榮父母。析人之珪。儋人之爵。懷人之符。分人之祿。紆青拖紫。朱丹其轂。今子幸得遭明盛之世。處不諱之朝。與羣賢同行。歷金門。上玉堂。有日矣。曾不能畫一奇。出一策。上說人主。下談公卿。目如耀星。舌如電光。一從一橫。論者莫當。顧默而作太玄五千文。枝葉扶疎。獨說十餘萬言。深者入黃泉。高者出蒼天。大者含元氣。細者

入無倫然而位不過侍郎擢纔給事黃門意者玄得無尙白乎何
爲官之拓落也揚子笑而應之曰客徒欲朱丹吾轂不知一跌將
赤吾之族也往者周網解結羣鹿爭逸離爲十二合爲六七四分
五剖並爲戰國士無常君國無定臣得士者富失士者貧矯翼厲
翮恣意所存故士或自盛以橐或鑿坏以遁是故鄒衍以頡頏而
取世資孟軻雖連蹇猶爲萬乘師今大漢左東海右渠搜前番禺
後陶塗東南一尉西北一候徽以糾墨製以鑰鉄散以禮樂風以
詩書曠以歲月結以倚廬天下之士雷動雲合魚鱗雜襲咸營于
八區家家自以爲稷契人人自以爲臯陶戴縱垂纓而談者皆擬
於阿衡五尺童子羞比晏嬰與夷吾當塗者升青雲失路者委溝
渠旦握權則爲卿相夕失勢則爲匹夫譬若江湖之崖渤澥之島
乘鴈集不爲之多雙鳧飛不爲之少昔三仁去而殷虛二老歸而

周熾子胥死而吳亡種蠡存而越霸五殺入而秦喜樂毅出而燕懼范雎以折摺而危穰侯蔡澤以噤吟而笑唐舉故當其有事也非蕭曹子房平勃樊霍則不能安當其無事也章句之徒相與坐而守之亦無所患故世亂則聖哲馳驚而不足世治則庸夫高枕而有餘夫上世之士或解縛而相或釋褐而傅或倚夷門而笑或橫江潭而漁或七十說而不遇或立談圓而封侯或枉千乘於陋巷或擁盪擘而先驅是以士頗得信其舌而奮其筆窒隙蹈瑕而無所詘也當今縣令不請士郡守不迎師羣卿不揖客將相不俛眉言奇者見疑行殊者得辟是以欲談者卷舌而同聲欲步者擬足而投跡鄉使上世之士處乎今策非甲科行非孝廉舉非方正獨可抗疏時道是非高得待詔下觸聞罷又安得青紫且吾聞之炎炎者滅隆隆者絕觀雷觀火爲盈爲實天收其聲地藏其熱高

明之家。鬼瞰其室。攫拏者亡。默默者存。位極者宗。危自守者身全。是故知玄知默。守道之極。爰清爰靜。遊神之庭。惟寂惟寞。守德之宅。世異事變。人道不殊。彼我易時。未知何如。今子乃以鷓臯而笑鳳皇。執蠓蜓而嘲龜龍。不亦病乎。子徒笑我玄之尙白。吾亦笑子病甚。不遭臾跗扁鵲。悲夫。客曰。然則靡玄無所成名乎。范蔡以下。何必玄哉。揚子曰。范雎魏之亡命也。折脅拉髀。免於徽索。翕肩蹈背。扶服入橐。激叩萬乘之主。界涇陽。抵穰侯而代之。當也。蔡澤山東之匹夫也。鎮頤折頰。涕唾流沫。西揖彊秦之相。搯其咽。炕其氣。拊其背。而奪其位。時也。天下已定。金革已平。都於洛陽。婁敬委輅。脫輓掉。三寸之舌。建不拔之策。舉中國。徙之長安。適也。五帝垂典。三王傳禮。百世不易。叔孫通起於枹鼓之間。解甲投戈。遂作君臣之儀。得也。呂刑靡敝。秦法酷烈。聖漢權制。而蕭何造律。宜也。故有

造蕭何律於唐虞之世則諄矣有作叔孫通儀於夏殷之時則惑矣有建婁敬之策於成周之世則繆矣有談范蔡之說於金張許史之間則狂矣夫蕭規曹隨留侯畫策陳平出奇功若泰山響若砥隕雖其人之瞻智哉亦會其時之可爲也故爲可爲於可爲之時則從爲不可爲於不可爲之時則凶若夫藺先生收功於章臺四皓采榮於南山公孫創業於金馬驃騎發跡於祁連司馬長卿竊貴於卓氏東方朔割名於細君僕誠不能與此數子者並故默然獨守吾太玄伯父蓋塢先生云雄偉瑰麗後人於此不能復加恢奇矣爾按此文前半

侯前後再言之而義別非重複也末數句言人之取名有建功於世者有高隱者又有以放誕之行使人驚異若司馬長卿東方朔亦所以致名也今進不能建功退不能高隱又不肯失於放誕之行是不能與數子者並惟著書以成名耳響若砥隕者以狀其聲名之盛文選及說文引之並作響

漢書作響古字通也說文巴蜀名山岸脅之旁著欲落响者曰氏氏崩聲聞數百里而臯部又有應曰奈謂陵阪曰陔然則此字作氏音承旨

切或作砥首丁禮切皆本說文義皆可通

揚子雲解難。

客難揚子曰。凡著書者。爲眾人之所好也。美味期乎合口。工聲調於比耳。今吾子迺抗辭幽說。闕意眇指。獨馳騁於有亡之際。而陶冶大鑪。芴薄羣生。歷覽者茲年矣。而殊不寤。豈費精神於此。而煩學者於彼。譬畫者畫於無形。弦者放於無聲。殆不可乎。揚子曰。俞。若夫閱言崇議。幽微之塗。蓋難與覽者同也。昔人有觀象於天。視度於地。察法於人者。天麗且彌。地普而深。昔人之辭。迺玉迺金。彼豈好爲艱難哉。執不得已也。獨不見夫翠虯絳螭之將登虛天。必聳身於蒼梧之淵。不階浮雲。翼疾風。虛舉而上升。則不能撒膠葛。騰九閔。日月之經。不千里。則不能燭六合。耀八紘。泰山之高。不嶠嶠。則不能淳滃雲。而散歛烝。是曰宓犧氏之作易也。縣絡天地。經目八卦。文王附六爻。孔子錯其象。而彖其辭。然後發天地之臧。定萬物之基。典謨之篇。雅頌之聲。不溫純深潤。則不足曰揚鴻烈。而

章緝熙蓋胥靡爲宰寂寞爲尸大味必淡大音必希大語叫叫大道低回是目聲之眇者不可同於眾人之耳形之美者不可棍於世俗之目辭之衍者不可齊於庸人之聽今夫弦者高張急徽追趨逐者則坐者不期而附矣試爲之施咸池揄六莖發蕭韶詠九成則莫有和也是故鍾期死伯牙絕弦破琴而不肯與眾鼓夔人亡則匠石輟斤而不敢妄斲師曠之調鍾埃知音者之在後也孔子作春秋幾君子之前睹也老聃有遺言貴知我者希此非其操與

揚子雲反離騷。

有周氏之蟬嫣兮或鼻祖於汾隅靈宗初謀伯僑兮流于末之楊侯淑周楚之豐烈兮超旣離虜皇波因江潭而淮記兮欽弔楚之湘纍惟天軌之不辟兮何純絜而離紛紛纍目其洪溷兮暗纍目

其續紛。漢十世之陽朔兮。招搖紀于周正。正皇天之清則兮。度后
土之方貞。圖彙承彼洪族兮。又覽彙之昌辭。帶鉤矩而佩衡兮。履
櫬槍。目爲綦繫。初貯厥麗服兮。何文肆而質難。資姬娃之珍鬢兮。
鸞九戎而索賴。鳳皇翔於蓬階兮。豈駕鵝之能捷。騁驪昌曲。躋
兮。驢騾連蹇而齊足。枳棘之榛榛兮。蝮豸擬而不敢下。靈修旣信
椒蘭之唆佞兮。吾彙忽焉而不蚤睹。矜芰茄之綠衣兮。被夫容之
朱裳。芳酷烈而莫聞兮。固不如蓑而幽之離房。閨中容競淖約兮。
相態以麗佳。知眾媮之嫉妬兮。何必颺彙之蛾眉。懿神龍之淵潛
兮。埃慶雲而將舉。亡春風之被離兮。孰焉知龍之所處。愍吾彙之
眾芬兮。颺燿燿之芳苓。遭季夏之凝霜兮。慶天頽而喪榮。橫江湘
目南淮兮。云走乎彼蒼梧。馳江潭之汎溢兮。將折衷。虩重華。舒中
情之煩。或兮。恐重華之不彙。與陵陽侯之素波兮。豈吾彙之獨見。

許精瓊靡與秋菊兮。將目延夫天年。臨汨羅而自隕兮。恐日薄於
西山。解扶桑之總轡兮。縱令之遂奔馳。驚皇騰而不屬兮。豈獨飛
廉與雲師。卷薜芷與若蕙兮。臨湘淵而投之。楳申椒與菌桂兮。赴
江湖而漚之。費椒稭目要神兮。又勤索彼瓊茅。違靈氛而不從兮。
反湛身於江皐。纍旣爻夫傳說兮。奚不信而遂行。徒恐鸚鵡之將
鳴兮。顧先百草爲不芳。初纍棄彼慮妃兮。更思瑤臺之逸女。抔雄
鳩目作媒兮。何百離而曾不壹耦。乘雲蜺之旖旎兮。望昆侖目膠
流。覽四荒而顧懷兮。奚必云女彼高丘。旣亡鸞車之幽藹兮。焉駕
八龍之委蛇。臨江瀕而掩涕兮。何有九招與九歌。夫聖哲之不遭
兮。固時命之所有。雖增欷目於邑兮。吾恐靈修之不纍改。昔仲尼
之去魯兮。斐斐遲遲而周邁。終回復於舊都兮。何必湘淵與濤瀨。
涵漁父之舖歎兮。絜沐浴之振衣。弃由聃之所珍兮。躋彭咸之所

遺懷信鳴咽望溪宗伯所
論鼓得字雲用意深處

古文辭類纂六十八